



الهيئة العامة لقصور الثقافة
إقليم القناة وسيناء الثقافي

في عز الحرب ولاد الأرض

الكاتب غزالي



الهيئة العامة لقصور الثقافة
إقليم القناة وسيناء الثقافى

مطبوعات

إقليم القناة وسيناء الثقافى



رئيس مجلس الإدارة

رئيس التحرير

عبد الرحمن نور الدين

لوحة الغلاف إهداء من الفنان : د. علي السويدي

الأستاذ

لعل فيه ما يروى
ما له كنياتي وأهرا من

كثير
غفر الي


الله لا طرفة

١٩٨٥ - ١٩٨٦ - ١٩٨٧

١٨ ٢٩٧ ٢٧٥

بسم الله الرحمن الرحيم

٢٧٢ ٢٧١
مثله



السَّمْسَمِيَّة وحرب الاستنزاف

لابد لمن يسجل تاريخ النضال المصرى الوطنى أن يذكر بالتقدير ذلك الدور المهم الذى لعبته آلة السَّمْسَمِيَّة فى مرحلة مهمة من تاريخ نضالنا. فقد استطاع أفراد المقاومة الشعبية فى مدن القناة وخلال حرب الاستنزاف. تلك الحرب التى بدأت وقائعها فى النصف الثانى من يونيو ١٧ واستمرت حتى السادس من أكتوبر ٧٣.. استطاعوا أن يحولوا هذه الآلة الوترية الشعبية البسيطة إلى سلاح يشحذ الهمم ويقوى العزائم ويتنبأ بالنصر القادم لا محالة .

لقد تحول أبطال المقاومة الشعبية الذين استبقوا فى هذه المدن للدفاع عنها بعد أن تم تهجير كل الأهل. إلى شعراء يكتبون بالدم قصة حبهم لهذا البلد. وعلى آلة السَّمْسَمِيَّة غنوا قصة هذا الحب. وتكونت فرقة أولاد الأرض فى السويس. والصامدين فى الإسماعيلية. وشباب النصر فى بورسعيد.. وانتقلت الأغاني القذائف إلى كل أنحاء مصر.. وتغنى بها كل من عاش هذه المرحلة وعصرته آلام النكسه.. إلى أن حقق نصر السادس من أكتوبر..

واليوم ونحن نوثق هذا التاريخ الشعرى لمنطقتنا. فإننا نرجو أن نرد بعض الدين لأبطال مصر الذين سقط العديد منهم وهم يحملون إلى جانب السلاح آلة السَّمْسَمِيَّة .

عبد الرحمن نور الدين

رئيس إقليم القناة وسيناء الثقافى

هكذا قالوا عن ولاد الأرض...

خلجاتهم الشعرية صاغت المعركة.. فهم نبثها وفروع أشجارها وأصواتها التي ارتفعت.. التقت.. مع هدير المعركة

وهذا هو السر في أنهم ثبرة من نبرات البطولة التي تتسم بها حياة الرجال، وقفوا بين الأنقاض، ومن زمجرة القنابل ودوى انفجاراتها، يتحدون العدو، بقدر ما يتحدون الماضي، بقدر ما يتحدون الهزيمة وبقدر ما يتحدون أسباب الهزيمة كلها.

هذا الصوت الرافض.. الهادر.. أيقظ فينا روح التصدى.. الإلحاح.. شحذ أسلحة العزيمة والجلد، ومتابعة كل متغير والتهيو له.. دافعهم إلى هذا روح الإنتماء والإرتباط بالأرض الوطن وشرف التواصل مع تاريخ هذه الأمة التي تمتد جذورها الأصيلة لفجر الإنسان الحضارى الأول، من ثم كان جزءاً من عبقريتهم العفوية، أن اختاروا لهم اسماً مميزاً هو «ولاد الأرض»، وفي هذا ما يكفى التنويه به لفلسفة تكوينهم وتوجههم الأصيل المنتمى لتراب هذا الوطن الممتد.. الوثيق الصلة بأمتهم العربية، فكانوا بحق ناقوس الصحو الجديدة فى الخندق الأول المرابط على طول خط المواجهة مع العدو.... إنهم، نعم (ولاد الأرض) ونبث هذا الوطن،

قرأتهم وسمعتهم

شبان من وطنى الكبير.. من رقعة صغيرة فى هذا الوطن.

تحولت فجأة إلى ينابيع من نور.

رأوا الزحف إلى القتال

ورأوا العودة الحزينة

ورأوا القوة تبنى من جديد

رأوا الصمود.. شاركوا به.. كانوا إحدى دعائمه.. رافقوا تطوره.. أصبح دفاعاً، أحسن ردعاً، أشرق تحدياً وجهداً خارقاً من أجل النصر، إكتنوا بنار المعركة وانفعلوا بمأساتها الدامية، وتأججت فى صدورهم نار الثأر والانتقام وإرادة النصر والتحرير،

فكانت أغنياتهم بيانات عسكرية.. صدى لدوى القنابل وشواظاً من نار المعركة ونبضاً متفجراً من دماء الشهداء، في بساطة يتميز بها التعبير والإيقاع، وصدق يتجاوز صناعة الكلمة وتوزيع الألحان ليقدّم هذه الأغاني عفو الخاطر وباستجابة فورية لانفعالات الموقف وكأنها ومضة برق أو ثورة بركان أو صرخة مكلوم أو صدى أذان. سنوات ست والأحداث تهز ضمائرهم، تشحن أفئدتهم، تحرك في أعماقهم نسمات الحرية.

لم يكن الخرس إحدى صفاتهم، ولم يكونوا مُنْظَرِينَ.. لكنهم كانوا يتقنون فن التوجيه وضرب الأمثلة وإقامة حلقات الدرس وعقد حصص التعليم في بساطة لا نهائية لا تخضع لنظريات السياسة وأيدلوجيات الخوف والحرص على الحياة، فالواقع الناتج كان أفدح وأكبر من أية رهبة أو تحوط.

الشاعر.. لم يقرض الشعر.

الصوت الجميل.. لم يستهوه المجون

الأنامل القوية.. لم تتحرك للألحان المائعة

لكن، بعد المعركة وكشف الحقائق، تبدل كل شيء..

الشاعر أصبح شاعراً فعلاً.. والصوت الجميل إنطلق من عقاله، والأنامل القوية تحركت

بالحان القوة و (مارشات) الإعداد والخروج لأخذ الثأر.

- وكان «ولاد الأرض»

في الحقول الدامية، وسط أمطار اللهب والدمار، بين أنات وتوق الجرحى إلى السلاح حيث ظهرت القيم على حقيقتها، فارساً متمرداً دعواً، يتحرق شوقاً إلى يوم القتال.

هذا كله صيغ شعراً.. تردد في الأفواه حاراً.. صيغ إيقاعه كما لو كان قصفاً.. جسد إرادة شعب.. إرادة مدينة تصنع شعباً جديداً.. جيشاً جديداً من أبناء الشعب، يمور بالوعي، ينضج بالثقة، يفور بالأمل، ينضج في صورة اليقظة.

بغير حاجة إلى صياغة فنية في الكلمات والأوزان، وبغير عبقرية (عاجية) في استلهم الألحان والتوزيع الأوركستراي، خرجت أغاني ولاد الأرض، فطرية صادقة غنية بالمشاعر البسيطة وكأنها مياه النيل في زمن الفيضان.. قوية متدفقة مختلطة بالطمي الذي يترسب غذاء للأرض ومصدراً للخصب والنماء.. تلك هي صورة من فن الطبيعة الذي يتفاعل مع الحياة.

- عندما قرأتهم. تراءت لى الصورة التى عاشت طويلاً فى أمالى.. صورة الشعب
المحارب.. صورة الأمة المحاربة.. الأمة الواحدة المحاربة.

«ياللا يا شعب العروبة

قوم.. ثور

وافرض كلمتك

واصرخ بأعلى صوت.....»

وعندما سمعتهم.. أدركت أن الصورة بدأت تتحول إلى حقيقة، إنهم نادراً ما يتحدثون
عن السويس وهم أبناء السويس، وقليلاً ما يتحدثون عن مصر - وهم من شعب مصر..
وكثيراً ما يتحدثون عن العروبة.. عن الوطن العربى.

«لا! لا يا نيكسون؟ لا! لا!

الشعب العربى بحاله

صمم ليحرر وطنه

بالدم ويفدى بلده

مش ح نسلم.. لا! لا!

إن المعركة.. الخط الأمامى فى المعركة تمخض عن إيمان ليس جديداً، وأفرد لنا أدباً
مميزاً متميزاً وفريداً فى أدب المقاومة، كان محجوباً وراء ستار من القيم الزائفة
والاجتهادات الملتوية.

.....

تلك الدعوة الدوب للقتال والخروج للموت، وكأنها دعوة للنزهة فى قارب من الحرية، لم
تكن فى الواقع سوى بيان صارخ للتوحد وتحقيق النصر، ورؤيا الشاعر هنا، أن الإنسان
هو العتاد الحقيقى لخوض وكسب المعارك وتحقيق الذات.

«بيننا ياللا بيننا.. نحرر أراضينا

وعضم إخوانتنا.. نلموا.. نلموا

نسنوا.. نسنوا..

ونعمل منه مدافع.. وندافع

ونجيب النصر.. هدية لمصر»

أية صورة عبقرية هذه!.. ويا لهذا الماثور الإبداعى!.. ومن منا لم تهزه صورة هذا

الإصرار طريقاً ومدخلا واقعياً للتحدي والنصر.

- ولاد الأرض هي فكر دافع مميز في أدب المقاومة وكلمة أصيلة بلسان أبناء هذا الشعب لأبناء هذه الأمة، حفرت بها درباً موعلاً في النفس لبيان قدرة هذه الأرض في نبذ وطرد كل ما هو غريب ودخيل.

وحيث تضيق عليكم الصدور ويصدمكم الواقع، عليكم بقراءة ولاد الأرض لتتبينوا، كم كان الدرب مظلماً وكثيباً، ولكن كم كان الحفر بالكلمات أكثر بهاءً ونوراً فابتنى بالعمل مكاناً لنا مميزاً في زمن لا يعترف إلا بقوة التحدي وتحقيق النصر.

«وهكذا قالوا عن ولاد الأرض»

إهداء

إلى أمى السويس
وشهادتها الأبرار
برقية حب

-

إتعلنا منك.. كيف الموت يتحب
واتعلنا منك.. وقت الشدة.. نهب
واتعلنا.. ندوس الصعب
نمد الخطوة.. ندق الكعب
واتعودنا شهيدك يبقى.. عريس
واتعودنا اليوم الكاكي
ونوم الخندق لجل حماكى
يا أغلى مدينة وناس
يتباس ترابك.. يتباس
ياسويس
ياسويس
ياسويس

ولا لغيرك.

وصار إسمك..
سلام.. وغنا
...
ملايين.. ملايين.. يا مخلصين
هيا... هيا
حقوا الحقيقة للغيطان..
ضليله.
تعيشى يا عز.. منايا
نصر.. يا مصر..
غنا يا..
ولا لغيرك فى يوم .. غنيت
ولا لغيرك.. يحلا.. الغنا.

موال : مصر يا ندهتى.. فى الضيق
وغنوتى.. ع الريق
عاشقك حقيق
ناقشك.. على زنودى
بيارق.. نصر
مهما تدور الدواير.
الكل فانى.
وانتى اللى باقية
يا مصر..

ولا لغيرك.. يحلى الكلام
ولا لغيرك.. يحلى.. الغنا
ولا لغيرك.. نشيد.. يتقال
يا مصر.. تعيشى.. لنا

نشيدك بالدهما.. كتبناه
على طول التاريخ.. ملايين
عشقناكى.. وطن.. بلا آه
روينا بدمنا.. البساتين
ودورنا فى الصحارى
ألوف..
نرد عداكى.. فى.. م نشوف
نقشناكى.. ع الزمن.. حضارات

ولاد الأرض

إحنا.. ولاد الأرض
ولاد مصر.. العظيمة
تارنا حناخده.. بحرب
للنصر.. غناوينا
شباب.. ثوار
ما نسبش.. التار
إحنا ولاد الأرض

الحرب.. الحرب

لجل ولادى فى خيرها .. تعيش
م تقوليش .. م تعدلش.

...

أنا جوه بلادى .. ح اعبى ولادى
على الرجعية والخفافيش.
م تقوليش .. م تعدلش

الحرب.. الحرب.. يا شعب وجيش
الحرب.. الحرب.. يا شعب وجيش

...

م تقوليش م تعدلش
حل واحد غيره مفيش
لجل ولادنا الجاية .. تعيش
حرب الشعب وغيرها .. مفيش

...

مجلس أمن .. مينفعنیش.
جمعية عامة .. متهمنیش.
الحل فى إيدى وغيره مفيش
حرب الشعب .. شعب وجيش

...

قوة أمريكا .. أمور بولتيكا
حلف الأطلنطى .. م يهزمنیش
متقوليش .. متعدلش

...

الميت مليون .. متشمريين .. متشمريين
عايزين سلاح .. مستنظرين .. مستنظرين
حالفين يا حياتنا .. يا إسرائيل
بعد النوية دى ميكونلك .. عيش.

-

الاشتراكية .. كحل عينيه

ملعون

..
ملعون اللي م يتألم
ملعون اللي م يتكلم
ويمد إيده معانا.
ويكون للحق.. بلال
ملعون

ملعون.. أى.. صوت..
يعلى.. صوت المعركة
ملعون أى كلمة
تسلبنى.. الحركة
يا نارى.
يا نارى.
يا راية الإحتلال
يا شقة قلب بلدى
يا مدنسه.. القنال
ملعون

..
إسمعوا صوت مصر.. ينادى
يا تارى يا دم ولادى
لازم تقنوا الأعداى
وتدوسوا فى الصعب.. جبال
ملعون

..
ملعونه المداين
ملعونة الجنائين
لو سابت أى .. خاين
يرعش يوم النضال
ملعون

يا سلام .

أه يا سلام .. يا سلام .. يا سلام .	ودينا أمرنا بالسلام .
على السلام بكى الحمام .. يا سلام .	يا سلام
قبل العدوان كان الكلام عن السلام .	
هو أملنا .. يا سلام .	خاف الاستعمار على نفوذه
	قام لوى يوزه
زراعة .. زرعنا	علشان مصالحه راح تنهار
صناعة .. صنعنا	فى السلام
لجل بلدنا تعيش فى سلام	يا سلام
يا سلام .	
أممنا قنالنا .	زعق الغراب
وخيره جالنا	لم الأوغاد
ومنه عملنا .. السد العالي للسلام .	قاصدين لبلدنا
يا سلام	دمار وخراب
	علشان م ننشرش السلام
كتبنا ميثاقنا	يا سلام
واتفقنا	
مبادئه الستة لازم تتنفذ للسلام	وجونسون قال
يا سلام	وعمل قلقان
	على السلام
اشتراكيتنا .	ويغت مرسال ووراه مرسال
من بيتتنا .	علشان نحافظ ع السلام
وشامله حاجتنا	يا سلام

عمل مؤامره م تتحكيش
يوم ٥ يونيو م يتنسيش
بدا بالعنوان
ضرب الطيران
كان قصده جيشنا والسلام
يا سلام

لم الدليل
والسفاحين
وجاب الأساطيل
خلا اليهود إحتلوا سينا
يا سلام

لكن على مين
يا غدرين
حالفين نفنيكم
ونخليكم
درس وعبره للسلام .

سجل يا زمان

سجل يا زمان.. سجل يا زمان.

هنا في السويس زينه البلدان.

خضنا معارك نار في نار.

حالفين لناخد لبدنا

لبلدنا التار

ده يمينا بالله.. ده يمينا بالله

سجل يا زمان

أحلف بصدق الفلاحين

أحلف بشرف الشغالين

حالفين لنموت.. يا فلسطين

ترجع لأهلها.. عربية

ده يمينا بالله.. ده يمينا بالله

ياللا يا سوايسه.. يا سوايسه

يلا يا رجاله.. يارجاله

نلم بعضنا.. هيل هيل

سلاحنا في إيدينا.. على سينا

بلدنا في عتينا.. صخره عربية

ده يمينا بالله.. ده يمينا بالله

سجل يا زمان

كتالنا وبلدنا.. وبلدنا

حالفين لنفديها.. بحياتنا

ونفنى أعاديها.. لآخرهم

واللى يخطيها يا ويلة

راح ندقنه فيها

ده يمينا بالله.. ده يمينا بالله

سجل يا زمان

مش.. ح نسلم

باسم الأرض
واسم العرض
آدان الحرب
سنه وفرض
يانعيد مجد الأوطان
يانموت شهيدا.. أبطال
مش ح نسلم
لا.. لا.. لا

مش ح نسلم .. لا.. لا.. لا
رأى الشعب صاحب .. الحق
رأيه قاله عالي.. عالي
يوم ٩ و ١٠ يونيو
دفع ثمنهم غالى
...
قالها الشعب
اللى ولاده.. لجل بلاده
صبغوا رمل الصحارى
بذلوا الدم
وضحوا العمر
لبوا الأمر
من أول .. إشارة
راحوا يجيبوا لمصر.. الفجر
دفعوا العمر.. خيانه وغدر
مش ح نسلم
لا.. لا.. لا
قولها يا ناصر
كل الشعب العربى
فى إنتظار
يخوض.. النار
باسم الأطفال والتكالى
باسم الشهداء واليتامى

إحنا لها

إحنا.. لها ..
إحنا .. لها
الحرب إحنا.. قدها
ح نخوضها شعب وجيش.. سوا
ح نخوضها لجل ما ترتوى
أرض بلدنا بدمها
تطرح ولاد على .. كفها
منقوش عداله.. وخير كثير
كله يعيش إنسان.. وحر
مفیش صغير أو كبير
الكل واحد.. زندها
إحنا لها..
إحنا لها ...

التغيير

عايزين يا جال .. تغيير

الله يقويكم يا عمال
أديتوا واجبكم عال العال
علشان بلدنا تقوه كمان
نزيد انتاجنا يعم الخير
عايزين تغيير

يا فلاحين يا أصل بلدنا
أهلينا أنتم واسيادنا
عرقكم زادنا وزادنا
دى الاشتراكية طريق الخير
عايزين يا جمال..
عايزين يا جمال.. تغيير

علشان بلدنا تسير

تتخطى النكسة تطير

عايزين يا جمال.

عايزين يا جمال.

عايزين يا جمال.. تغيير

عايزين رواد عايزين قاده

م الشعب العامل بزيادة

أصل بلدنا محتاجه

جهد الصغير والكبير.

عايزين يا جمال تغيير.

عايزين م العلما والخبرا

أبحاث كثيره ومبتكره

تغنيا عن صنعة بره

واوروبا من إنتاجنا تغيير

عايزين يا جمال.. تغيير

عايزين م الكتاب والأدبا

الكلمة الحرة الملتزمه

وتكون ناضجه

وتكون صادقة

علشان تنور لى المسير

أشرف شيء

أشرف شيء تشارك
وتعيش لهب المعارك
إن مت شهيد في الجنة
وإن عشت فخور تنتهني
وتجيك الدنيا تبارك
أشرف شيء تشارك

حالفين لنجيب النصر

حالفين لنجيب النصر لمصر

بقوة السلاح

..

وكمان حالفين بترابك

يا مصر يا حلم ولادك

عدوك لن يرتاح

...

وفى السويس جنودك

واقفين حارسين حدودك

ومجدك مهره جاهز

يالقوة والسلاح

..

وفى السويس ابطالك

واقفين حارسين قنالك

حالفين ليجيبوا نصرك

بالدم والأرواح

حالفين يا مصر لنفديكى

وحياتنا نهديها ليكى

وتشاور الدنيا عليكى

يام الشبان والصباح

دبلى عيون القمر

لو بخلت بجهد
الحق بستانه فى إيدنا
الحق جبال من صهد
...
الحق دروب صعبه
لولاده مهواش صعب
ده اللى السلام غنوته
لازم نشيده الحرب
يموت عشان ضحكه
تتحنى بيها الأرض
تشفى عيون القمر
لما نصون العرض

دبلى عيون القمر
وعنينا سهرانه
بكت غصون الشجر
والأرض حزنانه
والشمس خبت حرها
علينا شفافانه
حتى الطيور ع الشجر
تتدارى خجلانه

يا صرخة الإنسان
اللى مرعوش أمانه
يا صرخة الإنسان
اللى زرع بستانه
حب ومصانع
وسد لجل أخوانه
كان السلام غنوته
والإنسانية أجفانه

زقق غراب البين
إترمى من حلمه
شاف الحقيقه اتفزع
بستانه قام قال له
أكثر من كده ح تشوف

..موال بهية

يا مغنيين موال بهيه
وحكايات الشاطر ياسين
يا مجررين جثة ماضينا
فى طريق الكادحين.
يا راعشين موال ولادنا
يا صانعين لون السنين
وقت الغناوى فات وعدى
الوقت وقت الحيرانين

توهتنا طول الحكاوى
ويا سير العاشقين
دا اللى ينسوا وطنهم
يعيشوا جينا مضللين
تكره الأرض سيرتهم
حلفاته بميت يمين
م تقول عليهم ولادها
طول ماها شاردين

يا مصر يا غنوه حياتنا
ولادك احنا حلفانين
م نعلم ولادنا غير
غناوى المنصورين

طوابير

طوابير الشعب الشعب الشعب
فى ساعة النكسة اللعنة الصعب
خرجت طوفان تتحدى الصعب

يوم ٩ يونيو اليوم الصعب
خرجت جماهير عمالنا الصعب
زى البراكين طوابير مع بعض
حالفين لبلدنا ندوس الصعب

كان فى المصانع فى ظروف صعب
زاد من انتاجه إتحدى الصعب
علشان الشعب م يصيح صعب
حدد طلباته حرب الشعب

..

ومن المزارع أصل الشعب
خرجت جماهير الأرض الصعب
طالبه السلاح بترعد رعد
علشان بلدنا يهون الصعب

إنذار يا أمريكا بأسم الشعب
الشعب العربى فى كل الأرض
صمم ليخوض الحرب الحرب
يقوده جمال البطل الصعب

القسم

قسم المقاومة الشعبية

تحرير الأرض العربية

علشان سلام البشرية

الإستعمار لازم يموت

قسماً بالزرع وبالصحرا

قسماً بالسد اللي رفعناه

علشان اجيالنا تعيش فى رخاه

الصهيونية لازم تموت.

قسماً بالعمال وبالمصنع

وبفجرى بلادى اللي بيصنع

وبفيض إنتاجى اللي ح يطلع

الاحتكار لازم يموت

قسماً ببلادى العربية

ح اكتب بسلاحى الحرية

واعمل علشان الاشتراكية

والجبان لازم يموت

أم الدنيا

يا مصر يا م الدنيا	إحنا أخلص ولادك
ولادك غضبانين	مين ليكى غيرنا مين
ع اللى جراك يا حلوه	ياللاً افتحى لنا قلبك
بأيدين الغدارين	تلاقينا ملايين
كانوا عاملين حبايبك	اسمك نشيد حياتنا
وعنك مسئولين	عمال وفلاحين
سلمتيهم حياتك	فداكى نادرين ولادنا
باعوكى الخوانين	جنود ومتقفين
باعوا أخلص ولادك	صاحبين وسلاحنا فى أيدينا
ورجعوا مبيجين	بحبك مغرمين.
الخير كان كله ليهم	حالفين لناخد تارك
وولادك شحاتين	من كل الخوانين
إن كنا مش ولادك	ونظهر أرض سينا
قوليلنا أمنا مين	والضفة لفلسطين
يا مصر يا أصل الحضارة	رح نزرع صخر سينا
والمجد من سنين	

بالفل والياسمين

يتعطر قبر ولادك
الشهدا المغدورين

كنتى نشيد حياتهم
وضحوا مسرورين

بالدم كتبوا اسمك
فى سجل الخدالدين

أمانه يا مصر عليكى
تفتكرى المخلصين

ولا تعتبش علينا
إن كنا غضبانين

م إحننا علشان ولادك
عليكى قلقانين.

إنذار

إنذار.. إنذار .. إنذار
إنذار .. يا أمريكيانى
آن الأوان .. إسمعنى
ح أرجع مارد .. من ثانى
وطريقى .. عرفتته .. سلاحى
وأدانى رفعتته .. كفاحى
وفى أى مكان .. راح أحاربك
بسلاحى . وايدى . وسنانى
وبعزمى ح أهد .. عزورك
وأفرض عليك مكانى
إنذار ..
إنذار ..
إنذار ..

فاكرينك.. يا سينا

بترولك وديرك
وعيون موسى.. وادينا
...
راجعين لك.. يا سينا
يا قصتنا الحزينه
ح نزرع شمس بكره
على صدرك .. جنينه

فاكرينك .. يا سينا
يا قصتنا .. الحزينه
ولادنا فى حضن .. أرضك
أمانه ..
خليكى .. حنونه
...
راجعين لك يا سينا
نوفى دين .. علينا
سامعين صوت رمالك
وهى بتنادينا

...
راجعين لك يا سينا
حالفين بنينا
لنلون حصاكي
بدم أعادينا

...
أمانه ياسينا
ربى أشهد علينا
ح ندفن فى ترابك
إسرائيل اللعينه

...

أمانة. . يا سينا
فاكرين .. ما نسينا

قوم يا شباب

قوم يا شباب.. وخذ مكانك
سطر بالدم.. خطوط زمانك
دور فى البلد .. وأغرس كلامك
إخلع جنور.. سارق أمانك

راية العدو .. قدامك
اسرع وخذ ... مكانك
أثار لدم .. إخوانك
آن الآوان .. إبدأ كفاحك

...
شغل عقلك.. فى راسك
فكر تعرف.. خلاصك
تحمى أهلك.. وناسك
وتزيل آثار .. أحزانك

...
إدّن بالكفاح .. على أدانك
إكتب بالبارود .. عزة أوطانك
إيدّر فى البلد... وعيك وعلامك
حقق بسلاحك .. نصرك وأمانك

يوليو ١٩٦٧

أبوح..٩

أبوح.. يا أبوح.
دم البلد.. مسفوح
ياصاحب .. البقرة
يازارع .. الشجرة
تتطرح .. وتديهم .. ولا تمر .. فيهم.
باعونا .. للكفرة

....

كذابه .. ضحكتنا
ندابه .. غنوتنا
كرامتنا .. ثورتنا
مخنوقة فى القهرة

....

أبو يا أبوح
أصرخ ألم.. وبوح
دا العدل بات .. مدبوح
ح نموت من الحسره

....

يا زارع الشجرة
جوه الغيطان .. سخرة
مرضان ولا بتقرا
شقى الجدود... يا شيخ
ضيعوه .. فى .. سهره

مش مهم

مش مهم الخلق تموت

مش مهم .

مش مهم نسف البيوت

مش مهم.

مش مهم حرق الفيضان

مش مهم.

مش مهم دك الحيطان

مش مهم.

المهم إنا فى الآخر نتقدم

نفرش صباح الحُب

ونبنى اللى إنهدم .

الألف ميل

مشوار الألف ميل يابلدنا
بخطوه يبتدى .
الصعب يا مصر درب طويل
اشتدى وابتدى .
دا الموت فى سبيل نصرك .. يا بلدنا
غنايا ومطلبى .

يا عيون شبابنا
أوعك تنامى
أحرسى البلد من الغيلان
دى بلدنا سينينها الجاية
عايزه القلوب قوية
عايزه الإيدى عفيه .
عايزه عزائم فتيه
تخنق طول الليالى

مين غيرنا يا مصر / يجيب النصر
بالسلاح مش / بالحكاوى
تطرح الآه المزروعة/ فى صدر أمى
أم الشهيد / غناوى
دى بلدنا واحنا ضميرها
ملهاش غيرنا وملناش غيرها
مشوار الصعب يا مصر طويل
مدى الخطاوى

برهوم ..؟

برهوم يا برهوم	ويشيلها فى عينه
يا بوزيد هلال	أى والله
قوم صحى الناس .. دى بلدنا	برهوم يا شطار
عايزانا .. كلنا ..	شاف كفر النجار
أى والله	كله مولع نار أى يا يعنى
برهوم كان .. حشاش	صمم ياخذ التار
عنده جوزة .. نحاس	أى والله
باعها وجاب رصاص	...
يحارب عدوه	برهوم البحرى
أى والله	راكب سفينته
برهوم الحشاش	عباها صواريخ .. مصرية
قام لم الناس	غرق بيها إيلات
قال لهم مابقاش	أى والله
ياللا على سينا	برهوم يا برهوم
أى والله	كلنا برهوم
برهوم سويسى	ياللا بينا .. نقوم
والسويس بلده	نحرر أراضينا
شاف ضرب عليها	أى والله
صمم .. ليرده	
أى والله	
برهوم صنايعى	
عاشق مصانعه	
حالف ليصونها	

ضى الليالى

مرمى فى الطريق
دايسه عليه جزم الكلاب
أبقى له ونصفه
أشفق عليه ولفله
وادفنه تحت الترات
يمكن يكون .. عضم أبوك
يمكن يكون .. عضم أخوك
دى الأمانه
والأمانه تبقى دين
مين يعيش لما تعدى من شقاه
شمس الأمل.
فارشة الطريق لجل الحياة
أصل الحياة ملهاش ثمن
غير الانتصار

من قصيده للشاعر
عبد العزيز عبد الظاهر
١٩٦٧

ضى الليالى خادع
يا غفلانين
عزم الحوارى طالع
يا مخلصين
صعب الطريق عدوه
واللى فيكم يلقى أخوه
خاين بلاده..
يدوس عليه
إيدك فى إيدى وربنا معانا
نسقى ورد النصر.
دمانا وشقاننا.
لجل ما تعدى المواكب من وراه
لجل ما الحياة تبقى حياة
نخلق البسمة من قلب أه
بطن الديابه للحم أخوك
كانت كفن.
عضماته تصرخ فى البرارى
امحوا العفن
أصل الحياة ملهاش ثمن
غير الانتصار
واللى يعيش يادى الصحاب
م اللى داق عفن الدياب
أمانه إن شفت العضم

يا ريس البحرية

ياريس .. البحرية .. يا مصرى
يابو .. العرق .. مصرى
يابو الكفاح .. مصرى
هات .. الدراع.
هاتلى دراعك .. هات
دا بحرنا .. بحرنا.
واين البلد صياد
قول للقمر
قول للقمر لوفات
إيد للبنا .. للبنا
وايدع الزناد تصطاد
قول للقمر
ح نعدى ونحارب
نفرش رمال الصحرا بالحنه
ونحنى قلب الأم
أم الشهيد غنوه
الغنوه دى سلاحى
الغنوه دى كفاحى
ومدفعى الصاحى
على القنال سهران

يا حلفانين بالدم ما تناموا
دوسوا الزناد.
واد الكلام..
مصرى
وأدى الكفاح
مصرى كل الرجال
مصرى
هات الدراع
هاتلى دراعك
هات

من قصيدة الشاعر
كامل عيد رمضان

يا سهرانين لجل ما تعيد
كل الولاد

أنا صامد

مهما كان الصبر .. مرّ
مر .. مر !
أنا صامد
ومهما طال الوقت . ومر
مرّ.
ح أفضل صامد
مش راح أكل
ولا أمل
لجل بلادى
ولجل ولادى
ولجل الشمس م تعرف بابى
أدوس ع الصعب
وأززع رعب
فى قلب عدوى
وأحنى بدمه..
إيدى وكعابى
حأخذ تارى
وأمحي عارى
واطهر أرض سينا
وكنالى
بعزى .. وحسمى
وحبى .. لوطنى
أفنى عدو دينى

وأمالى
..
وعشان بلادى
وضحكة ولدى
ومجد عروبتى
يرجع تانى
أضحى بعمرى
وأهز الدنيا
وأجيب النصر
يدق بيانى

لا لا «يا أمريكا» لا لا

قوم يا ابن مصر وشمر
جهاز سلاحك عمر
العدوان لسه قائم
والمعركة مستمرة
صوت الشهدا ينادينا
إلهذار يا أميركا بأسمينا
للصهيونية اللعينة
نهايتها فى أرض سينا
وفى القدس الحزينة
ح نرفع أعلامنا العربية

لا لا يا أميركا لا لا
قالها زعيمنا جمالا
اللى إتأخذ بالقوه
لازم يرجع بالقوه
ادى كلام الرجال

لا لا يانيكسون .. لا لا
الشعب العربى بحاله
صمم ليحرر وطنه
بالدم ويفدى بلده
مش ح يسلم محالا

لا لا ياديان لا لا
دى كانت مؤامره وخيانه
وجيشنا بخيره لسه
واقف جاهز الشط
الحرب لسه سجالا

لا لا يا أرشانه لا لا
من غير لف ودوارنا
مهما تساعدك أمريكا
راحت عليكى يا وىكا
زى خبيتها فى فيتنام

فات..الكثير

وندافع
ونجيب النصر
هدية لمصر
وتحكي الدنيا .. علينا
...
بكره يا بلدنا
ح نعوض .. اللى .. فاتنا
ح نكثر المصانع
ونخضر المزارع
ونجيب النصر
هديه لمصر
تسعد بيه .. أجيالنا
...
يا رب إشهد .. علينا
مصر يا ضى عنينا
نفديها بكل أرواحنا
نصنع بشبابنا .. صباحنا
ونجيب النصر
هديه لمصر
نرجع مجد .. ماضينا

فات الكثير.. يا بلدنا
ما بقاش إلا .. القليل
...
إحنا ولادك.. يا مصر
وعنيكى السهرانيين
نصرك أصبح.. نشيدنا
واللى يعاديننا .. مين
...
الهمة يا شبابنا
القوه.. يا جنودنا
ح نشق الليل.. بسلامنا
نحلب فجرنا.. بكفاحنا
ونجيب .. النصر
هديه.. لمصر
نكتب عليه أسامينا
...
بيننا ياللا.. بينا
نحرر أراضينا
وعضم إخواننا
نلموا .. نلموا
نسنا .. نسنا
ونعمل منه
مدافع

متسلحين

متسلحين ع القتال.. لعدوك.
متربصين .
شعب وجيش .. يد واحدة
ع الكفاح مصممين.
حالفين بأمجادك يا بلدنا
ويكل يمين
لنخلى النصر فى حاراتك
غناوي. ودين.
...
متسلحين وعيننا .. راصده فجرنا
وايدينا فى قلب بكره تغزل نصرنا
يا مصر يا إسم غالى.
يا موال عمرنا.
نهارك مهره جاهز.
أرواحنا.. ودمنا
علشان بلدنا.. ولعزتها
تكبر.. وتفوق.
لازم يا شبابنا.. ويا اخواتنا
نصحى ونفوق.
دى الاشتراكية قضيتنا
واجبات وحقوق
والحرية مش أمنية
الحرية كفاح مش نوق

...
متسلحين ح نحارب وح ننتج
وح نزرع غناوينا
يروبها الدم.. اللى إخواننا
بذلوه فى سينا
بكفاحنا ح نحفر نصرتنا.
عهد علينا.
يبقى السلام غنوتنا
نحميه بعيننا.

بسنانی ..

بسنانی .. وېضوافری
ونن عینی .. لو حکمت.
ح أھارب.
لو ألف طعنه فی .. جتتي
برمش عینی .. لو حکمت.
ح أھارب.
لو حتی جیش آمریکا
والإطلنطی .. ح أھارب
ح أھارب .
ح أھارب .
ح أھارب .

يسلم ..

خلى المدفع .. يغنى
أخويا دمه .. قاللى
خليك سهران .. تملئ
وافنى الأعادى
تسلم بلادى

تسلم كل إيد
تتمد .
تشدد .
خطوة بلادى
تسلم كلمة حق ..
بحق .
ع الكفاح بتنادى
تسلم .. بلادى

تسلم رجالة بجد
تشق لى صباحى
تسلم صرخة ويل من .. جندى
تنادى أنا صاحى
تسلم بلادى

....
تسلم كل إيد .. فى المصنع
ع المكن سهرانه .
تسلم كل إيد .. فى الغيط
بالعرق دفيانه
تسلم بلادى

....
عبي الكلام .. ياخلى
إفتح نارك .. وخلي

إحنا

إحنا.. ضد .. الظلم
و ضد .
و ضد .. الاستعمار
و ضد .
و ضد .. الاستعباد
و ضد .
و ضد أى خاين..
يعطل.. خطوة .. مصر
و ضد أى .. عميل
يشككنا .. فى النصر
احنا مع الإنسان.. فى أى مكان
وكل مكان.
ونحب شعوب.. الدنيا
تصبح.. حره.. فى.. خير وأمان
ونحب.. نشوف.. الضحكة.. سنابل
حب .. واطمئنان
ونحب نشوفك ..
طالعه .. يامصر ..
شايله .. سلاحك.
جاييه .. النصر
إحنا .. كل الشعب.
إحنا .

بكره

ح نفك قيدك.. يا سينا
تارى ما أفرط .. فيه
وأسقى رمالك.. دمهم
واللى إتهدم .. ح أبينه
يحضن قنالنا.. البواخر
الرايحه والجايه
بكره

بكره يعود.. الغنا ..
والملاغية
ويبيض على كتافنا .. الحمام
غيه ..
تخضر فى إيدينا السناكى ..
يا سوايسية
والصيادين تتطلق..
والمراكبية
يملا بلدنا .. السلام
ودمنا .. الديه
بكره

سلام لبلدى.. يا عم .. يا قوال
ولأهل بلدى.. أجمل كلام .. يتقال
حسك تغنى.. بالكلام .. إياه
طالعه بلدنا بعزمها ..
من قلب قلب الآه
فارشة الصباح .. الأخضرانى
لولدها .. الجاية
بكرة ..

آن الأوان.. يا حرب
أهلا ومرحب .. بيبك
مشتاق يا جوف المدافع
ع الشط واقف.. بيبك

سبتمبر ١٩٦٧

سهران

ياللا يا حريه طللى
خلى الغل فى قلبى يغنى
تسمعوا كل الدنيا تقوللى
مبروك النصر يا شجعان

سهران أنا سهران
على القتال.. سهران
سلاحى فى يمينى
وإيمانى
مالينى
لجلك يا نور عينى
حالف لخوض النار

أمى أنا وولدى
فداكى يابلدى
ع النار لأعدى
واحقق المحال

حالف يا أمريكا
لأصحي أفريقيا
وف اسيا افتحك
قبور تكفيكا

هل يا يوم التار.. هل
لحسن قلبى بياكلوا الغل
عمر الحر ما يرضى بذل
ولا يرضى يعيش فى هوان

ع الكنال

ع الكنال .. ع الكنال
ع الكنال أنا واقف صاحي
ع الكنال

إبعث يا ديان وهات
طيارات تعمل غارات
دبابات ومصفحات
أنا واقف صاحي

هات مدافع هات هاونات
هات عساكر البنات
أنا ابن مصر يا جبانات
أنا واقف صاحي

فانتوم ميراج أو ميستير
مدافعنا جاهزة للتكسير
إعقل بقي ومتيقاش زير
أنا واقف صاحي

واقف صاحي وعيني عليك
مستنى الأمر عشان افنيك
مهما إمركا تنفخ فيك
أنا واقف صاحي
ع الكنال.

هيلا.. هيلا

هيلا .. هيلا .. هيلا .. هيلا	في المصانع
هيلا .. هيلا .. ياللا .. بينا	في المزارع
شباب السويس.. تلاقينا	في الشوارع
في الخنادق	لازم أفضى.. عليك
...	يا أثناني
بالبنادق
على كل شير.. عنينا	يا خاين يا بورقراطي
...	يا معطللي.. خطواتي
أنا صاحي يا مصر أنا صاحي	تتحجج بالروتين
سهران وفي حضني.. سلاحي	يا جبان
واللي يقلل من قيمتي	يا خسيس.. يالئيم
واللي يكسر .. عزيمتي	يا بو فكر ضد ميثاقي
يحرم عليه.. صباحي	...
...	إسمع يا بورجوازي
إسمع يا إسرائيلي	يا حقير يا إنتهازي
بحق وطني.. وديني	مهما تروج إشاعات
وثقتي اللي في زعيمى	تتحسر ع اللي .. فات
في قنالي.. مش.. ح تمر	مش راح يتهز.. إيماني
ح تشوف من عزمى .. المر	...
قالها أبو خالد.. حبيبى	وإسمع يا رأسمالى
...	يا سارق قوت.. عيالى
يا رجعى يا إنهزامى	يعميك عرق العمال
عارفك شايك.. قدامى	وفي بلدى مالکش.. آمال

أنا عربي اشتراكي

.....

يا سلمي يا إنعزالي

يا مشككني في آمالي

أبو خالد قال

كلام رجال

الحرب.. الحرب .. الحرب

هيه آخر كلامي

ديسمبر ١٩٦٧

إنت فين

وينزل رص.. كلام	إنتف ين.. إنت فين.. إنت فين
والناس ناقصين.. علام	إنت فين .. يا سعادة البيه
وفى أول فرصه	إنت فين .
فى يوم النكسه	لما البين صاب بلدنا
	سيادتك رحت فين
سابنا وزوغ	علشان عندك.. عرييه
واحنا نموت	وعماره وفيل.. هديه
يا أخى توت	وإيرادك يومى.. ميه
...	رحت مزوغ واحنا.. نموت
واحد ثانى	يا أخى توت.
بصوت حيانى	...
تملى حياتى	يا سيدنا البيه يا أكبر تاجر
وفى الوطنيه	فى كل شيء فى الدنيا.. تتاجر
يقول ويرن	فى الوطنيه
أسامى تجن	فى القوميه
يشرب .. جن	فول طعميه
وكرشه.. طن	واشتراكيه
جاحد ما يحن	منشار طالع.. واكل
وفى التنظير	منشار نازل.. واكل
مالهوش.. نظير	هيجل قاله له
وفى التزوير	وماركس.. عمه
له رسم كبير	واينشتاين
ورشح نفسه وهات ياكلام	فين.. مش .. باين

وضعتنا إحنا
ودبحنا
وهم النكسة
ندقع ثمنه
وهو يفوت
ياخى توت

عن العدالة..
تقول.. يا سلام
بانت النتيجة..
عاديك ح يموت
قال إشاعات
تقولش.. مكوك
وسابنا وزوغ
وإحنا نموت
ياخى توت

...

الثالث فاضل
شهم.. مناضل
كفاح على ودنه
لصالح مين
مش عارفين
له صولات
له جولات
مواهب.. جاهزة
ويطولات
مسرح.. سيما
خرده.. قديمه
صحافة على ودنه
ومقاولات
أستاذ بولتيكا
عميل أمريكا
سياسه.. مصالح
خند.. وهات

أغسطس ١٩٦٧

الدب

طلعنا .. ندب
نزلنا .. ندب
ولسه .. الدب
فاتح الجب
واللى يقول كلمته.
ما نعرفش سكتة
ادى .. الدب.. وحكمته
امتى .. يا شعب.
تهب .. تدب

توته..توته

توته..توته..توته
فرغت الحدوته
إصحوا وفوقوا.. يا ناس
دى بلدنا كلتها.. الدوده
ملاقتش.. اللى يقول.. حاس

...
توته حكاية.. عجيبه
ح تشوفوا وجوه.. غريبه
جاين بلعبه.. جديده
مزيفتها.. حماس
بصوا لهم واحتقروهم
بماضيهم فكروهم
وقولوا صوتكوا.. العالى
قديمه.. فوقنا.. خلاص
توته..توته..توته

...
قوم يا شبابنا.. إتقدم
لخدمة وطنك.. قدم
برنامج ٣٠ مارس
مين غيرنا.. ح ينفع.. حارس
شمر ورى.. البهوات
صهرتها النكسه.. صهر
كفايه نمنا.. دهر
إصحوا وفوقوا.. يا ناس

مارس ١٩٦٨

إنت المسئول

ساعت النكسه.. اللعينه

وإنت المسئول

إسهر تابع وحاسب

إختار راجل مناسب

يقدر يحمى المكاسب

الشرط يكون منينا

وقلبه يكون علينا

واشترأكي.. زينا

قايم نايم وسطينا

وإنت المسئول

إنت المسئول..

أنت المسئول..

إنت المسئول ..

..

قرب والحق.. وإسمع

دقق ناقش.. إسرع

علشان أسباب النكسه.. تزول

قوم ناقش حاسب.. قول

إنت المسئول

صوتك .. صوتك

صوتك.. مدفع

صوتك.. صوتك

صوتك.. مصنع

صوتك صخرة فى صرح.. بلادك

صوتك شجرة تظل ولادك

إنت المسئول

قوم قتش ع المناضل

اللى كافح.. وناضل

من بين فلاح.. وعامل

ومثقف ثورى.. كامل

شاركنا فى المواقع

سهر معانا.. ودافع

ما هريش.. م المدينه

مارس ١٩٦٩

صاحي

خلي السلاح.. صاحي.

يوماتي.. صباحي.

عبي جوف المدافع

غلك وصب.. النار

خلص بلادك.. وناسك

م الشر والأشرار

ومهما طالت وقفتك

حسك تطاطي الراس

وعشان م تكمل.. خطوتك

خلي السلاح

السلاح.

السلاح.. صاحي.

يا مثقفين

تكتب أساطير في ترابها
ولما لحت البين
نسيت غياشي وحسين
حسين طخوه في ضهره
وغياشي راح ولا جاشي
دبحوا الأمان في بلدنا
وأنت شايف وماشي
على فين
على فين والعار في رقبتك
يا خاين بلدك وكتابتك
تهرب م العار على فين
دى بلدنا طحنها البين
شايفين بعنيكوا وخرستوا
أقلامكم راحت فين

على فين .. على فين .. على فين
يا جماعة يا مثقفين.
علامكم صوته فين
دى بلدنا طحنها البين.
شتيفين بعنيكوا وخرستوا
أقلامكم راحت فين؟
...
يا سيد المثقفين
استنتى حبتين
ح اقولك كلمتين
إسمعهم وإننت ماشي
أخوك حسين وغياشي
حسين طخوه في ظهره
وغياشي راح ولا جاشي
دبحوا الأمان في بلدنا
وأنت شايف وماشي
على فين
لميت ورقك وح تهرب
وسايب بلدك تتكهرب
مع إنك كنت يوماتي
تزعق بالصوت وتهاتي
دى بلدنا واحنا ولادها
كلنا ع الباب خطابها

١٩٦٩

مؤتمر الأدباء الشباب
الزقازيق

إمتى.. العيد

بقد الحسرة فى قلبى
ليوم التار.. مستنظر
وطالت الوقفة.. وإمتى العيد
...

الوقفة طالت ع المينا
وإيماننا بمصر.. مالينا
بنادقنا.. تصرخ.. فى إيدينا
بتنادى يا ريس.. عدينا
وطالت الوقفة.. وإمتى العيد

من قصيدة للشاعر
زين العابدين فؤاد
١٩٦٩

لا إله إلا.. الله
محمد رسول .. الله
يا برتقان يا أحمر يا جديد
طالت الوقفة.. وإمتى العيد
...

الوقفة طالت ع المينا
وإشتاقوا.. المراكيبه
يا ربيع يا هابب.. من سينا
مراكبنا.. لسه.. مكفيه
وطالت الوقفة.. وإمتى العيد
...

يا بوقشرة فى لون.. الرملة
رملتنا الدم.. ماليتها
القتلة جنب.. القتلة
فوق الرملة.. وتحتها
ودموع القهر فى قلبى
غير الحرب.. ما يطفيها
وطالت الوقفة.. وإمتى العيد
...

يا برتقال كلك.. فصوص
والفص قلبه.. صغير
رقيق رقة.. هلال
مسنون سنة.. خنجر

عربية..

عربية.. يا مصرنا
يا عربية.
يام الفدا والتضحية
لزام إنا الفدا
للأمام إنا الندا
أنا البارود ه اللي
إعتدا.
عربية
عربية
عربية يا مصرنا يا عربية

ليه يا حمام ..

روح يا حمام سليهم
غنى ورقرف حواليههم
هات لى تراب رجليهم
أعملوا كحل لعيونى
هيه
روح يا حمام واشرح لهم
شوقنا وحبنا لهم
م احنا عشان أمنهم
قبلنا نخلى المدينة
هيه
يا شعب مصر العظيمة
إكرموا وحيوا أهالينا
يبقى لكوا دين علينا
نفدى مصر بحياتنا
هيه
إحنا الشباب السويسيه
حياتنا نهديها هديه
فدا عز الأمة العربية
يا أهلى افخروا بيا
هيه

ليه يا حمام بتنوح .. ليه
فكرتني بالحبايب
ليه
قال الحمام / ودموعه نازلين
هجم اليهود على / أراضينا
قاعدين فى سلام / نزلوا علينا
بالصواريخ والمدافع ..
ليه ؟
هجم اليهود / على المدينة
بمتين طياره / من سينا
الله يجازى اللى / خانونا
خلونا فارقتنا / أهالينا
ليه
أهل السويس يا أهالينا
فراقكم / والله على عنينا
من يوم ما سبتوا المدينة
دموعنا لسه فى عنينا
ليه .
يا أهل السويس وإسماعيلية
يا أغلى م الدنيا عليه
إحنا ولادكوا الفدائية
على القنال ليل ونهار
ليه

أكتوبر ١٩٦٧

غنى يا سمسمية

...
غنى لكل حارة
فيها م الحرب.. خسارة
إصابه واللا إشارة
علامات النصر.. الجايه

...
غنى للبيوت اللى خانقها.. السكوت
وقوليلها شدة تقوت
وح تشبع ملاغيه

...
غنى لكل مهاجر
فى الريف وفى البنادر
فى معسكر أو فى شادر
وقوليلهم على عينيه

...
غنى ودقى الجلاجل
مطرح ضرب القنابل
راح تطرح السنابل
ويصبح خيرها.. ليه

...
غنى يا سمسمية
للشبان السويسيه
وإخواتهم فى إسماعيلية
أولاد مصر وحراسها

غنى يا سمسميه
لرصاص .. البندقية
ولكل إيد.. قوية
حاضنة زنودها .. المدافع

...
غنى للمدافع
واللى وراها.. بيدافع
ووصى عبد الشافع
يضرِب فى الطلقة.. ميه

...
غنى للجنود
سمير وعلى ومسعود
وغباشى لجل يعود
وفى إيده النصر ليه

...
غنى لكل عامل
فى الغيط وفى المعامل
بيأدى الواجب.. كامل
وإديله ورده هديه..

...
غنى لكل دارس
فى الجامعة وفى المدارس
لمجد بلاده حارس
من غدر .. الصهيونية ..
غنى لفلاحينا
اللى بتشقى وتدينا
وتشوف الويل.. علشاننا
طول يومهم.. للفجريه

نوفمبر ١٩٦٧

النصر قرب

النصر قرب يابلدنا النصر قرب.

ياللا ياعدوى .. يا عدوى

قرب.. وجرب

أهلاً يا حرب .. أهلاً

...

كلنا يابلدنا.. أتدرب.

ولاحدش فنيا.. اتهرب.

ياللا ياعدوى.. قرب

ومعاك أمريكا.. وجرب

ح تلاقى أسود واقفين

ع النصر مصممين

بيقولوا للحرب.. أهلاً

أهلاً يا حرب.. أهلاً.

...

خطينا النكسه.. المرة

فى جوه بلدنا.. وبره

ولا عادش جبان.. بالمره

ولا خاين.. ح يعطلنا

ياللا ياعدوى.. قرب

ومعاك أمريكا.. وجرب

ح تلاقى أسود واقفين

ع النصر مصممين.

بيقولوا للحرب.. أهلاً

أهلاً يا حرب.. أهلاً

يا شعب العروبة

إعرف عدوك.. وانشد غنوتك
واللى يخون قضية بلده
لازم .. لازم .. لازم
لازم .. يموت.

ياللا يا شعب .. العرويه
قوم.
ثور.
وإفرض.. كلمتك
إصرخ بأعلى صوت
خض الليل..
وازرع ويل.
لعدو أمتك
وإجلب لمصر نهار
دم ونار
زوق.. سكتك
وإحمى.. بلادك
علشان.. ولادك
يعيشوا قصتك
فلسطين.
فلسطين.. يا عارى
سينا.
سينا.. يا تارى
يا قبر إخواننا.. اللى محاربوش
راحوا غدر.. ولا لحقوش
يقولوا للشعب.. قوم
قول كلمتك
وارفع سلاحك.. واحمى ثورتك

طريق النضال

ومعاك يا عبد الناصر
ثوار لآخر.. المشوار
أمر .
أمر.. نخاطر

طريق النضال.. مخاطر
والنصر تضحيات.

يا ابن مصر.. يا شاطر
قوم عوض.. اللي فات

...

دى بلدنا رغم .. قهرها
صامدة.. بتغزل.. نصرها
مين غيرنا.. ح يدفع.. مهرها
ويعزها.
ويجيبلها النصر.. يا شاطر

يا ولاد مصر العفية
رجالة.. يا شجعان
يرضيكوا مصر الحرة
أم الأمجاد.. زمان
أنجاس صهيون.. يدوسوها
واسم العروبة.. يتهان
إضرب وخاطر.

...

إتلموا وقولوا.. يا هادى
علشان مجد الأوطان
نفدى ترابه.. بحياتنا
ونعيد له مجد زمان

قول كمان

جوه وبره فى سوريا .. وسينا
وصى الشهدا .. يحنوا علينا
ناخد دورنا .. الكل فدائى
وقول كمان
قوللى يا شاعر ..
عبى كلامك
نار وبارود .. وإملا حفان؛
وأحدف نتور هز الدنيا
تصحى تشوف جولتنا .
الثانية.
فتح وسينا وجبهة .. عراقى
صواعق نازله .
طوفان حتلاقى
حمامه تبيض .. فوق كتف فدائى
وقول كمان

قوللى .. يا شاعر
قوللى .. كمان
خلى كلامك .. ناب وسنان
يكبش .. يهيش .. قلب الخونه
يطلع فجرى .. سلام .. وأمان .
قول .. كمان
قوللى يا شاعر .. متخبيش
خلى كلامك .. حرب وجيش
يشن حروف الكلمة .. حراب
خنجر .. مدفع .. م يخليش
خاين .. رجعى .. خسارة .. يعيش
وقول كمان .

...
قوللى يا شاعر
وإملا بلادى
كلمة نضيفه .. شريفه .. تنادى
تلف الغيط والمصنع .. شايله
بشاير نصر .. بطول الوادى
وقول .. كمان .

...
قوللى يا شاعر
نار ح تلاقى
تشب .. تهب فى قلب إعدائى

كلمتى

تخضر وتكثر روابيها
وتحول الصخر.. جزاير

يا كلمتى الحرة يا دينى
يا قلبى.. يا عينى
يا فلسطينى
يا مسجدي الأقصى.. يا نارى
يا قدس.
يا مهد مسيحي
ولولى.. صيحي
بيدى..
وطيحي
بأعداء سلامى.. ونهارى

يا كلمتى الحرة.. نورى
لفى وزورى
إحكى وقولى
ووزعى البسمه.. بشاير
لفلفى الغيط.. وقوليله
بكره نجيله.
نحنى نخيله.
بنصرنا داير.. داير
...
يا كلمتى الحرة.. مدى
إغرفى وإدى
بوسى وشدى
على إيد جنودنا.. السهرانه
ليلهم نهارهم.. ع المدفع
تحمى وتدفع
تسهر.. تصنع
من دمها لمصر.. مناير
...
يا كلمتى الحرة.. يا قوتى
شقى وفوتى.
حاضنة بيوتى.
وشايه من عرقى.. حمايل
لفى الصحارى وأرويه

إصحى.. يا مصر

إصحى يا مصر.. ودوسى.. خوفك
خطى فوق.. قهر السنين..
واحضنى فى صدرك .. ولادك
جه .. ميعادك
مزعى الاله .. والأتين
وأطلعنى م الريف كتايب.. ع الحدود
إقلقى نوم المدينة .. بالبارود
وأمرينا .. كلنا .. لأمرك نطيع
دا إنت مصر حلمنا
فوق الجميع ..
فوق الجميع ..
فوق الجميع .. يا مصر

مرثية.. الشهداء

يا نجمتين ضى
من قلب السويس
يا فرج .. يا عويس
...
عدوده
...
سير يا نسيم الصبح.. نار
ما تهدى
وأعصر جراح.. قلبنا
لفل ودور .. فى البوادي
واحكى حكاية.. عمرنا
طفى النور.. يا بلدنا
يا بلدنا طفى.. النور
وأمضغى صبرك.. يا بلدنا
يمكن ..
نهب.. نثور
نقرش عضانا.. نهار
تتحنى بيه.. وتمدى
سير يا نسيم الصبح
نار ما تهدى

الشهداء من أعضاء فرقة ولاد الأرض
يوليو ١٩٦٩

غضبان
وجانى صوته
من قلب قلب.. الموت
غضبان وبيعاتب
يا قلبكم
وعرفت رسمه
من قلب قايمه.. أسامى
كذبكم
مع إنكم
قاتلينه.. إنتوا
بصمتمكم
سلطان
يوسف حسين
يا نجمتين.. ضى.. من قلب السويس
يا فرج.. يا عويس
يا كل الشهداء.. يا ولاد.. بلدى
يا ناقشين سعادتى.. بدمكم
إكمتمكم
أصدق
وأشرف مننا
طول عمركم
سلطان
سلطان
سلطان
يوسف حسين

نشيد فتح

إشتد يا فتح.. إضرب.. وإشتد
هد عدو عروبتك .. هد.
حول الزيتون.. قنابل
وازرع بيارتك.. مناجل
بقد الفل فى قلوبنا
بقد التار وأولادنا
سجل بالدم.. سطور.. المجد
فلسطين.. يا حياتنا.

...

اصنع للعرويه.. نهارها
وأكوى الصهاينه.. يثارها
بقد النكسه... ومرارها
بقد الشهدا.. أبطالها
بقد عروبتك .. وأملها
صُب عليهم نارك.. صب
فلسطين.. يا حياتنا.

مهداه لمنظمة فتح

نشيد.. الجبهة

رجعيه.. وصهيونيه.
وإن يسألوكوا يا فدائيه
عن فلسطين وإيش حالها
قولوا حالفين.. لنحفظ
كل العالم.. موالها

إن يسألوك.. يا أخى.
قولها.. وعلى.. صوتك
عربي فدائي.. من الجبهة
وتكمل.. بندقيتك.
...

وإن يسألوك.. يا فدائي
ريش إنت وإيش.. هويتك
أصرخ فدائي.. من الجبهة.
وفلسطين.. قضيتك

وإن يسألوك.. يا رفيقى
ويحاولوا يكفوا.. سلاحك
أضرب إضراب.. م تخلي
أحداً يعوق.. كفاحك

وإن يسألوكى.. يا صبيه
شدى القامه.. وقولى
أنا بنت الجبهة.. وفدائية
أخت أمنييه.. دجبرى.. (١)

يا مقدم روحك.. فدا وطنك
يابن الجبهة الشعبية.
اضرب فى عداك.. ولا ترحم

(١) فدائية من الجبهة

يالبيبي

يا أخويا يالبيبي.. يا جارى
يا خويا فى مجدى... وعارى
دا عدوى.. عدوك.
واحد.
وعروبتى. عروبتك
واحد.
قدسك تنده.. عليك *
تحريرى فرض.. عليك
فى ليبيا.. وأى.. مكان
إضرب فى الأمريكان
دى أميركا هيه الحية
وهى الصهيونية
بتمص فى دم.. إخوانك
فى فلسطينك
وجولاتك
وحيجى النور عليك
إضرب وافتح.. عينيك
أهلاً يا خويا.
فى ليبيا.. أهلاً

(ترجمة: محمد عبد الله)

يا هادي

هادي.. يا هادي.. يا هادي
نصرک.. قرب.. يا بلادي
علشانک.. اضحى.. بعمرى
وأعيد بكفاحي.. أمجادي

يا ولاد مصر يا أملها
قوموا.. إفتوا.. ثراها.. وقنالها
علشان عزها.. وأملها
لازم تفتنوا.. الأعادي

إفدوها وأرووا.. ترايها
من دم.. اللي .. غصبها
واللي خانها.. وأصابها
مالوش مكان.. في بلادي

يا شباب مصر.. يا شبابها
احموها وعيدوا.. شبابها
وأملوها وإبنوا.. جنابها
بمصانع تملأ.. الوادي

إشتدى

يا بلدنا إشتدى
وإتحدى.. التحدى.
ضمن الصف.. ومدى
شأيله.. سلاحك..
عدى.
شدى صباك
شدى

الجزيرة.. الخضراء

من قلب الجزيرة.. الخضراء
راح أطلق.. حمامي
وأفرق ع الحبايب
شربات نصرى.. وسلامي
يا عيني ..
يا يوم الجزيرة.. الخضراء
بداية نصر.. أتى
كان جى وفاكرها.. سبيه
سحقتوا بدباباتي
يا عيني..
يا يوم الجزيرة.. الخضراء
يا علمى وعلامي
يا زغاريد.. مدافعى
فى قلبه.. الجبان
يا عيني..
يا يوم الجزيرة.. الخضراء
يا يوم الأسود
ح أرسلك ذهب وفضه
وأهديك للجنود
يا عيني ..
يا يوم الجزيرة.. الخضراء
رديت لى إيمانى
وحقى بسلاحي.. أخذه
لوطنى ولجيرانى
يا عيني...

أصدق.. نغم

يا أصدق.. نغم
يا صوت.. المدافع
عن أشرف.. وطن
كلنا ح ندافع
صبي يا مدافع.. صواريخ النار.
النار يابلدنا.. أهون م العار.

..
صبي يا مدافع.. وهزي بلادي
دوري في دوربها.. وكوني منادي
حيا ع الكفاح..
من قلب الجراح.
والله م حيداوى جراحنا..
إلا كفاحنا.. وسلاحنا.
يا فجر يا مصلوب.. على سينا
مكانك.. مكاني

صبي يا مدافع.. صواريخك ثاني
أخلص من قلقي..
وأخذ مكاني
طواير على سينا.. تحرق غاصبها
تحضن في طريقها.
القدس.. وتحميها.
تعلی رايات الشهدا.. إخواني

من جوف الخنادق

من جوف الخنادق
الحرب يتحسم
بالعلم والبنادق
المجد يترسم
لجموا اللسان يا عرب
قولوا بالمدافع
حيا ع الميدان نتصف
كلنا ندافع

من عيون.. برج الحمام

وهدوا الصهيونيه
وازرع جولان.. وسينا
والجبهة.. الأردنية
على كل شبر.. فدائي
وإن مات.. راح يطرح.. ميه

من عيون برج الحمام
بيطل.. مدفعي
طلقاته.. في صدر.. عدوي
زغزوته.. في موقعي
الحرب أهى.. يا ولاد
الحرب أهيه

...

حالف بقتالي.. ويغيطاني
وبيوت بلدي.. المحنيه
ح أفدي مصانعها.. وشوارعها
وأقدم روجي.. هديه
الحرب أهى يا ولاد

...

الحرب أهى يا ولاد
الحرب أهيه
نسف وتدمير وكرب
وسلام درعاته.. ملويه
والخلق تموت.. جماعات
لكن في الحرب حياة المجد.. الجايه

...

الحرب أهى يا ولاد
يا شباب سيناء.. الفدائية
إتوضوا بنارها.. وصلوا

يناير ١٩٦٨
غناء سمير الأسكندراني

الفاتحة

سورى لبنانى.. بيلاقى
حتفه فى قدسه.. وسيناء
الفاتحة

الفاتحة.. للعسكرى
سبع السباع.. الفللى
واقف وحاضن.. مدفعه
بطل وحارس.. موقعه
والفاتحة

الفاتحة للباتشاويش
حاضن سلاحه
تقول عريس
بيقول ألفين.. ميكفنيش
أضحى بعمرى.. ومصر.. تعيش
والفاتحة

الفاتحة لكل ملازم
بيحب جنوده.. وملازم
بيعمل كل اللى.. لازم
علشان النصر أكيد عازم
الفاتحة

الفاتحة لكل قائد
ضابط صغير.. أو رائد
لمجد بلده ناوى وعاقده
النصر ضميره قايم.. راقده

الفاتحة

الفاتحة لكل فدائى
فلسطينى أو عراقى

إضرب.. يا عدوى

ولا شبر ح سبيه.. فى أرضى وقنالى
والقدس قدسى.. وسينا.. وجولانى
وكل اللى هدمته.. ح أبنيه.. من ثانى
ومصانعى ح تكبر تكثر.. وغيطانى
وح نضحك.. نضحك.. ونكركر
دا اللى ح يضحك فى الآخر
هو اللى ح يضحك.. أكثر

اضرب يا عدوى.. اضرب وكتر.
خرب فى بلدنا.. وبيوتنا.. وكسر
وأعمل ما بدالك.. وإنسف .. ودمر.
زود فى غرورك.. واضحك وكركر.
دا اللى ح يضحك فى الآخر.
هو اللى ح يضحك.. أكثر.

راصدك يا عدوى.. يا عدو سلامى
يا حارق جرنى.. وغيطى.. ومكانى
يا مشرد أهلى.. وراعش أمانى
يا كافى مراكبى.. ومدينتى.. وقنالى
زود فى غرورك.. اضحك وكركر.
دا اللى ح يضحك فى الآخر
هو اللى ح يضحك.. أكثر.

هانت يا رفاقه وبانت بشايرها
من بطن المدفع.. طالعها وتكبيرها
الله على بلدى الله.. الله
الله على شعبى لومد خطاه
زود يا عدوى إطفى.. واتجبر
دا اللى ح يضحك فى الآخر.
هو اللى ح يضحك اكثر

بلدى

بلدى..
بلدى..
أرضى..
عرضى.. ولدى.
يا غل الدنيا اللى فى قلبى
ع الاستعمار.
يا جثة أخويا اللى فى قبره
تصرخ بالتار
صرخه تناديننا
أشرف شىء لينا
نحرر أراضينا
من سوريا لسينا
خلوا..
خلوا الكفاح دوار

عواد

أهو جه أوانك.. يا عواد
أهو جه أوانك..
أرضك بتنادى.. وتقولك
أنا هو قدامك.
إسرع وشارك.. واتجهز
وخذ مكانك
أهو جه.. أوانك
عواد يا مجدع قوم
دور فى البلد
شهل واتجهز.. واتحضر
قوام.. قوام.. يا ولد
حاصر عداك واكشفهم
واحمي قلب.. البلد
وأهو جه أوانك

طوابير طوابير.. طوابير
عمالا وجنود.. ومتقفين
عبوا عناد الغيطان
تطلع طوفان.. طوفان
يا فلاحين.
وبدا وقت الخلاص
م الحرب.. مفيش مناص
سمعت النداء.. بودانك
لما أبو خالد.. ناداك
وأهو جه أوانك

يحرّم علينا النوم

يحرّم علينا النوم.. ما نتنهّاش
م تهدي نارنا.. في يوم.. ولا نهداشي
تكتب مدافعتنا السلام للدنيا.
ومصر من غير نصر.. ما تبقاش

....

يا ولاد بلدنا الحرة.. هل هلاككم
مدوا الأيادي.. مصرنا.. موالكم
خلوا البارود والحرب.. هي غناكم
أصل السلام بالسلام..
عمره ما جاش.

....

وانقرطت الأيام في إيدنا
يا شبابنا.. حاس.
يا شعبنا.. زيدوا.. المدد
خلوا المدد برجاس
يرفع بيارق نصرنا.. للدنيا
ولنصر مصر العمر.. ما يغلاش

سطر رياض بالدم.. أول خطوه
بموته شاوور.. يا شعب..
مد الخطوه.
دا الحل مش في قصور..
ومش مطاطية
الحل دمي.. ومدفعي.. ورشاشي

والله ح ترجع ثانى

وينصرك تتخايل..
وتحول من غيطانك
وترد الجمائل.
من فوق شجر الجنائن
تشاورك السفاين
اللى ما شيه.. بتتMAIL
فى البحر.. والقنال
والله .

والله.. والله.. والله
والله ح ترجع.. ثانى
ليبتك ولغيطانك.. يا خال
وح تلقى الرمله.. خضره
على طول القنال.
والله.
وح تلقى شجرك .. على
والفاكهة فيه.. بتلالى
وبتنده لك.. تعالالى.
أنا غاليه ومهرى.. غالى
من دم الرجال.
والله
والله لبركه تخضر.. سينا
وتطرح قل.. يا خال
وكنوزها وخيرها.. ح يكثر
ويفوق الخيال.
بس جهز زنودك
واسهر وإبذل.. جهودك
وإحمى ضهر.. جنودك
اللى حارسين.. حدودك
من سوريا.. للقنال
والله
والله ح ترجع ثانى لبيبتك

لإمتى ح تفضل.. ساكت

لإمتى ح تفضل.. ساكت

يا شعب ونعسان.

إمك السيدة..

وأبوك الإمام

....

بتمد الدنيا وتجري

وإنت مكانك.. نشفان

حافى ومرضان ولا تقدر

تقول إنك تعبان

ومداين الظلم.. بتعلى

وإنت من غير.. لسان

وتقيم عمارات.. على كتفك

وتنام جنب الحيطان

لإمتى

شايف بعينك.. ومبلم

من إمتى كنت.. جبان.

بلدك بتضيع.. قدامك

ومحوطاها الغيلان

يا ولاد مصر العفيه

زجاله يا شجعان

يرضيكوا مضر.. الحرة

أم الأمجاد.. زمان

أنجاس صهيون.. يدوسوها

وإسم العروبة.. يتهان

ولإمتى

مرثية.. الشهيد.. مصطفى أبو هشام

من سكات.	وكان
من سكات.	وكان
من سكات.	وكان.. كان.. يكره الكلام
من سكات.. مات.. مصطفى	وكان لما يحكى لى.. أحلامه
كيف شمعة..	أو اللي شافه.. فى .. منامه
تقيد نفسها.. للناس	أضحك أنا..
وعمرها.. بينطفى..	وأقول إن شاء الله
من سكات.. مات	بعد النصر..
مصطفى	يا هلترى.. حتكونى.. فاكرانا..
...	يا مصر.
أيوه كان يعشق.. الموت	وكيف شمعه تقيد نفسها للناس..
وعاش عمره.. يضحى فى.. سكوت	وعمرها بينطفى.
وكان.. فارس	من سكات.
وله ألف ألف دراع فى حوارى السويس	مات مصطفى.
تعمل تقول.. بلدى.	(عدوده)
وكان حارس.	جرى إيه يا موت..
بصماته لسه فى سينا..	جرى إيه.
تبشرنا.. ترسينا	إنت عميت واللا.. إيه
وكان
ريس.	داير تقطف فى الرقاب
أسألوا.. الليل	وكل أجل وله.. كتاب
كان يعرفه.. كويس	بس يا موت..
وكان	هو العتاب

مصطفى كان.. بدري.. عليه

...

وصى يا موت لحد.. عليه

محجوز له في الجنة.. قصر.. ليه

دا كان بطل ولا يعلا.. عليه

ومات بطل را ح نفخر .. بيه

...

ولا يغلى عليكى.. يابلدنا

عمرنا واللا.. ماصابنا

دا مصطفى عريس..

عريس.. وسابنا

ومات شهيد.. حلال.. عليه

مصطفى أبو هاشم

قائد منظمة سينا

وأحد أبطال مصر في كمال الأجسام

إستشهد ٨/٢/ ١٩٧٠

صف واحد

صف واحد

قلبي واحد..

يد واحدة ع العدا

صاعقة،

متسلحين..

متسطين.

بالحب بالإيمان

بالآمال البارقة

يا مصر..

إطلعي. ومزعي

صمتك وكوني

حارقة.

مصر يا أشرف ندا

يا أمتنا إحنا الفدا

إحنا جنودك.

إحنا زنودك.

إحنا بارودك

يد واحدة ع العدا

صاعقة.

حلوا..

حلوا.. حلوا.. يا حلوا
هيا للحرب.. غنوا
دى المعركة.. مريره
عايز الجهود.. كثيرة
وكل واحد فى.. محله

...

حلوا حلوا.. يا حلوا.
مدوا إيديكم.. ما تكلوا
مكان لخاين.. فينا
أورجعى.. بيعاديننا
ونضفوا.. ما تكلوا..

...

حلوا هيا هيا.. يا ناس
إزرعوا الغيطان.. رصاص
دى الحرب واعره.. وقاسية
عايزة الرجاله.. القاسية
بنارها اتوضوا.. وصلوا

حلوا هيا هيا.. علينا
ح نجيب النصر بإيدينا
وح تبقى كل سينا
قبور للى.. يعاديننا
وح نملا قنالتنا.. بدموا

رمضان ١٩٧٠

أنا جي يا سينا

أنا جي أنا جي.. أنا جي.
أنا جي يا سينا.. أنا جي.
شايف الحصو في رمالك.
بیشاور علی
جايلك أنا وإخواتی
زی جیش.. الضی
وح نزرع كل خطوه
بمليون ورده.. ویاسمینه
وأنا.. جي

بصدق الفلاحين
أنا جي.. أنا جي.. یاسینا
بعزم الشغالين
أنا.. جي أنا جي.. یا سينا
یا بسمه مصر الخضرة
تحریرك فرض.. علينا
وأنا جي.
أنا جي وعلی.. سلاحي.
وتاری.. أدانی.. كفاحي.
فرفورك.. واد.. فلاح
وشایل الشمس في زندی
وضلوعي فاردها.. سفينة
أنا.. جي

يا ولاد.. البلد

يا ولاد البلد..

بنت أو ولد..

هموا.. إلتموا.. ومدوا إيديكم

صونوا.. مصر.. ضى عنيكم

مدوا إيديكم.. وإحموها

بدم عداها.. حنوها

دى البلد عايزه مدد

والعمال هما.. المدد

دى البلد عايزه.. مدد

والشباب هما.. المدد

دى البلد.. عايزه مدد

والفلاح أصل.. المدد

شدوان

شدوان.. شدوان.. شدوان
ثمانين .. ثمانين .. ثمانين
ثمانين علامة نصر
فى سككك يا مصر
حيوا جنودنا الشجعان
يا شعب يا انسان
احفظ نشيد شدوان
واهتف تعيشى يا مصر.
واهتف تعيشى يا مصر.
ثمانين علامة نصر

ثمانين شهيد أو أكثر
مليون عليها ما يكثر
من سينا لأسوان
راح يبقى كله ميدان
وقبر للعدوان
مدوا الأيادى لمصر

...

يا عدو بلادى ودينى
يا ويلك يوم تلاقينى
هانت وأن الألوان
ح نخوضها كما الطوفان
ونضحى كمان وكمان
ونموت وتحيا مصر

جزيرة شدوان بالبحر الأحمر
أحد معارك حرب الاستنزاف
وقد استشهد دفاعا عنها
ثمانون شهيدا من جنود مصر البواسل

يا إذاعة

مدد يا إذاعة
يا تليفزيون
يا صحافة .. قومي
صحي .. النوم
يا سينما .. يا مسرح
يا فنون
المعركة تنطق .. الأخرس

مش ح أغنى للقمر

لا .. مش ح أغنى .. للقمر

ولا .. للشجر

ولا .. للورد .. فى غيطانه

وما نيش - سواح

ولا ح أقول للهوا .. طوحنا

طول يا بلدى

ما فيكى شبر .. مستباح

لا .. مش ح أغنى .. للقمر

...

لا .. مش ح أغنى غير .. للمدافع

ولكل إيد واقفه .. تدافع

فى البرد والحر .. اللى لافح

لجل الوطن

يصبح براح

...

لا .. مش ح أغنى غير .. للعساكر

ولكل قلب .. لمصر .. فاكر

ويدمه ينقش يومها .. وباكر

وبينى بصموده .. الصراح

لا .. مش ح أغنى غير .. للفدائي

اللى علشان بلده .. يلاقى

حتفه فى قدسه أو .. سينائى

راسم بدمه .. أغلى .. صباح

...

لا .. مش ح أغنى غير .. للمثقف

اللى بعلمه .. علم .. وثقف

كافح وناضل ولا مره .. وقف

خطوة بلاده .. بالصباح

...

لا .. مش ح أغنى غير .. لبلادى

وأضحى عمرى وأهلى وولادى

وأظهر ترايبها من كل .. عادى

ترجع عظيمة .. غالية .. وبراح

لا .. مش ح أغنى .. للقمر

فوق التل

فوق التل	كتفا سلاح.
تحت التل	اسمع. النداء
بص يمين	يا بين العروبة قوم
بص شمال	قدم الفدا
تلقانا ولاد الأرض	الفدا
فى قلب الليل	أصمد وقاوم حاصر العدا
فى قلب الليل / حلفنا لنبدد / ميت مليون	دا احنا ولاد العروبة
نجماية	أحفاد صلاح الدين
العهد علينا/ يا بلدنا	فى قلب الليل
لنرسملك./ عقد النصر / بميت مليون/	
ورداه	حسك يكل يا فدائى
وإن كان على صدر بلدنا.	أو تنتنى
الموت بيطوف	حسك تسمع
يحصد فى الناس / وغيطانها	غير / صوت/ القنابل/ فى الغنا
من غير م يشوف	حسك/ تشوف
لكن يا بلدنا	غير بشاير/ نصرنا
طول ماحنا حنكون صاحيين	حسك / تسبب خاين
العزم ضميرنا	يثرثر ضدنا
وسلاحنا/ فى الإيد جاهزين	با طك فى باطى
ح نحرر سينا/ إن شاء الله	يتخفق عدونا
وح ترجع حرة/ فلسطين	يتعتق شبل الخيام
وف قلب الليل	واللا جئين
	وف قلب الليل
هلا ها للا يا شعب هيل هيل	
الحرب كفاح مش هليلا	

١٩٧٠

هل هالك

يا شعب هل هالك
يا بوا العرق سيال
يا مخضر قلب غيطانك
يا فاحت القنال

يا ابو التاريخ/ وسام / على صدر الزمن/ أهرامك
يا معلم الدنيا/ الحضارة../ بفنك وبعلامك
يا شعبنا/ هل هالك.

يا شعبنا

يا حب الشغالين/ والفلاحين
والولاد/ أمات إيدين في قلب بكرة/ شغالين
في سينا /وقلب رمالها
يفتلوا / في الصعب أمالها
وأمالها هي/ أمالك
وحياة أهلك وعيالك
يا شعبنا/ هل هالك

يا شعبنا

يا غلابه يا مات ضهور محنيه
من طلعت الفجر لما للمغربيه
دي سنين بلدنا محنيه ومصلوبه
لسه الأعادي على قلبها منصوبه
وعشان رايات العدل والحرية.
تبقى علمنا للسنين الجاية
دوس الزناد.
وهل هالك يا شعبنا

الفجر طالل

الفجر طالل من قلب الحطام.. بيلالى.
خطوا الجراح خلوا الكفاح.. موالى.
ياللى أنت واقف والعينين سهرانه.
على الحدود أضرب وزود عن حمانا
هانت يا شعبي الله معاك
الفجر طالل.
هانت يا شعبي بهمتك.. إياها.
الحرب موال السلام.. وغناها.
وبيوت بلدنا/ وبحرها/ وقنالها
طالبه/ صباحها/ ومجدها/ ومكانها
من بين إيديك/ أمت سلاح
مصرأوى
الفجر طالك.

يا شمس يا شموسه
طللى وأسطعى
دفى غيطان الغلابة
وحنى مدفعى
وفوتى ع الخنادق
والولد أمت بنادق*
بوسى زنود العساكر
وقولبها لعللى
العركة الصعبة هانت
والفجر طالل

عوف الأصيل

نفس الحكاوي إياها
أمات جرس ودفوف
مسيرها تقلق نومنا
نخطي جبال الخوف
يا عوف

عوف الأصيل يا عوف
يابو الكتاف حماله
يا بوا الزنود/ ياما/ عافرت
والصدر/ دوم مكشوف
دبل الدراع م الركته
ولاقلت شوف

يا عوف
عوف الأصيل يا رفاقه
احنا كلنا عوف
طال/ الوقوف ع الطاقه
نعسان. ولا كسوف
فات القمر ولا / مساً
مرعوش ضياه/ م الخوف
يا عوف

عوف الأصيل يا بلدنا
لساه/ أصيل/ ولاخان
شايك عمره /كله
غنوة أمل وحنان
حيا الله بطحه جبينه
واتحرم م الطوف
يا عوف

لسه الحكاوي في السكة
شاله الخطاوي يا عوف

تك..تك

يا بلدنا قومی أصحی آمال
طول عمر ولادك أبطال
علشانك ياما/ شقوا/ جبال
وهزموا تثار وروم
يا بلدنا يا أم /الحضارة
للعالم/ كنتی منارة
طول عمرک/ شجاعة قداره
وأمجادک / ع الدنيا نجوم

تك..تك.. بوم بوم بوم
يا بلدنا..
يا خُم النوم
يا بلدنا يا خم النوم
أولادک/ راحوا/ ماحوم
لاسلتی. ولا خفتی/ اللوم
يا بلدنا / قومی صحی / النوم

بلا بلنا/ نسيت غناها
وبتيكى/ والقمرى معاها
ع الشهد/ اللي نسيناها
وجتھتم فى سينا بالكوم

يا بلدنا قمرک / متحاش
بيولول / فى إيدین أوباش
الشمس ما حتعرفناش
طول م احنا / رايعين فى النوم

يا خلائق ماشين/ م دريانه
دى بلدنا/ فى العار/ غرقانه
وصهاينه كلاب محتلانه
عروبتك. إشحالها/ اليوم

راية النصر

ولا عمر راية النصر

حتفارق جبينك يا وطن

إحنا فداك

ولا عمر. دقت كعبنا.. فوق أرضنا.

تفارق خطاك.

دا الشعب / هو البندقية/ والمدافع/ والرصاص

إحنا السوايسة / الفدائية

جند المقاومة/ والخلاص

ولا عمر راية النصر/ حتفارق جبينك

ولا عمر الصعب يهزنا/ يا شعبنا/ قوم للكفاح

نفدى العروبة/ دمنا/ مصر أمنا/ عاشقة الصباح

والله ندفع عمرنا. فدا كل شبر / فى أرضنا

يصبح براح

ولا عمر الظلم دام على أرضنا.. أسأل تاريخنا والزمان

طول عمرنا..

ياما انهزم/ على أرضنا..

مغول/ تتار فرس/ ورومان

دا الشعب عمره/ ما ينهزم/ ويقول خلاص

تشهد آثارنا بمجدنا/ ويزندنا

نجيب. الخلاص.

ولا عمر راية النصر حتفارق جبينك

ولو..

والشعب. وراه يبسطر
للنصر بدم/ ولاده
حالف ليضحي/ اكثر
ويعيد بكفاحه / أمجاده
لو حتى/ أمركا/ معاك
أنا صامد وأتحداك

ولو .. ولو .. ولو
لو حتى أمركا معاك
يا عدو بلادى ودينى
أنا صامد واتحداك
لو حتى أمركا معاك

إكذب وأبدر فى سمومك
وروج فى الإشاعات
وأتغر وزيد فى جنونك
ووسع فى الجبهات
نهايتك حددناها
على ايدنا حتلقى فناك
لو حتى أمركا معاك

إيه يعني كسبت جوله
الحرب/ ياما جولات
ح نخوضها معاك للآخر
أصرخ/ لكن هيهات
ح نهدي قواك / م نخلي
لو حتى./ أمركا. معاك
أنا صامد واتحداك

جيش المليون مستنظر

إشهد يا ليل

إضرب وقيس
خطى العويس
وخذ بتار اللي تغدر

أشهد يا ليل يا قدر
علينا في ساعة الخطر
دى مصر أم وحببيه
والسويس أخت القمر

أشجع ولد ابن البلد
ومصر أمه المخلصة
شاف العدو على أرضها
لضم الصباح ويا المسا
صمم يعيد مجدها
وقدم روحه للخطر

عربي وعاوى
مد الخطاوى
وف مصنعه سهر الجدع
عامل بيحنى ضهر يومه
بينتج ويعمل البدع
أصل البلد عايزه الولد
مخلص وشاطر وجدع
الحرب داير والدم فاير
يا خلق سيبوا الثرثرة
دى الحرب حرب.. خراب وكرب
خلوا سلاحكم مسطرة

أسوان

سلامات فى أسوان رجالى

سلامات.. سلامات

يا رجال السد العالى

سلامات.. سلامات

إحنا فى السويس إحنا

بنلضم ليلنا فى صباحنا

تعدى النسمة تجرحنا

طول م العدو قبالى

سلامات.

سلامات.

سلامات سد وكما

سلامات.

سلامات.

يا دروع مصر العظيمة

سلامات.

سلامات.

إهلاً كوم أمبو يا رجاله

يا عرقانين يا شغاله

عشان بلدنا تزيد هاله

عشان بلدنا تزيد هاله

قيمو المدافع فى الغيطان

سلامات.

فى أسوان رجالى

سلامات.

سلامات .

ح تقول.. السويس

ح تقول السويس
أم القلب
زى الفل
ح تقول الحواري
كان شمسنا
ح تقول الغيطان..
كان.. زندنا
وكان حبيب.. الكل
أخ وأب.. وعم
وكان يشيل.. الهم
ح تقول الغلابه
كان مجاديف.. ورغيف
وقلبه كله.. ناس
ح تقول الغلابه
كان بسمه وكسوه.. وعشوه
وصوته الكاكي
ينادي.. فداكي
يا أحلى غنوه.. للسويس
يا حامد محمود (١)

(١) محافظ السويس
١٩٧٠

يا مدينتي

أفديكي يا مدينتي
يا شراعي.. يا سفيتي
يا دراعي.. يا عزيمتي
على صدرك أنا ..
شبيت
على دراعك..
ياما حظيت
وعليكي ما تغلى.. الروح
يا مدينتي ..
يا شراعي.. يا سفيتي
يا سويس ..
يا سويس ..
يا سويس ..

العتبة قزاز

يا بو عتبه قزاز والسلم نايلو فى تايلو
الطفل فى بلدى شاب
والقهر عامل عمايله
يا صبيه مالك خسييتى.. آه يانارى
لسه لا رحتى ولا جييتى.. آه يانارى
قالت اليهود / نسفوا/ بيتى
ولحم/ إخوانتى/ مكوم

....

عيب / يا مصرى/ تعالى أتفرج
فى السويس. وإسماعيلية
رايه. العدو. عاليه ترفرف
بالصواريخ / مش/ بالنايلو

.....

راية العدو./ قدامك .. آه يا نارى
خنجر/ فى قلبك/ ووجدانك آه يا نارى
إمتى تغير على أوطانك
وتفوق م اللي قايلو

....

قاعد بتضحك وتتسلى آه يارنارى
وأرض أجدادك محتله آه يا نارى
لو أنت/ حر/ م تستنى
وعدو/ فى بلدك/ يوم

ألف عام

لو حتى طال الحرب
ألف.. ألف.. عام
لو حتى زرعوا.. فى سكتى
جيش الظلام.
لو حتى دبجوا فى غنوتى
شدو السلام
أبدأ م افراط يوم
ولا أستكين
ولا مدفعى يقبل
غير النصر.. الميين
لو حتى طال الحرب.
ألف
ألف
ألف عام

رايح الجيش

رايح الجيش.. رايح الجيش
يا ناس بركولى
رايح الجيش

طبلولى أرقص أنا.

مستنى الطلب من سنة.
فداكى حياتى يا مصر أنا.
يا ناس بركولى
رايح الجيش

بعث العمده قلت جى

إشارة خاصة رحت جرى
قالولى الجيش فرجت ياخى
يا ناس بركولى
رايح الجيش

سمعت الخبر عايز أطيّر
من فرحت قلبى بَسْتُ الغفير
ح أروح الجيش وأطلع طوابير
يا ناس بركولى
رايح الجيش

ح أسمع كلام الباتشويش

أترقى قوام يدكور نيش
وف دفعه ع السويس
يا ناس بركولى
رايح الجيش

ح اضرب نار ع البنادق
وأسهر ليليه فى خنادق
واكيد عدوى يقوم طاقق
يا ناس بركولى
رايح الجيش

ح أقف حراسه على القنال
ليل ونهار من غير كلل
أفنى الصهاينه أوطى الملل
يا ناس بركولى
رايح الجيش

ع الحدود بسلاخى حالف
أضحى بعمري ما تخالف
دا الموت فى سبيل وطنى شرف
يا ناس بركولى
رايح الجيش

راية العد وقدامى
خنجر فى قلبى ووجدانى
مرة وما عادتش تعود ثانى
يا ناس بركولى
رايح الجيش

صعيدى مصرى حر أنا
م سبش النار عمرى أنا
لو ضربونى بميت دانه
يا ناس بركولى
رايح الجيش

يا مدافع لالى.. لالى

يا مدافع / لالى لالى
قصرى / فى اللالى
وصحى بلدنا / بحالها
تفوق / وتلحق / حالها
دا شرف / عروبتنا / غالى

يا مدافع / دوى / دوى
وانفجرى / فى / قلب عدوى
وقيدى / فى سينا / غضبها
تحرىق / تاكل غصابها
دا النصر / ثمنه غالى

يا مدافع / كونى / لسانى
فيكى / شرفى / ومكانى
يا ولاد / مصر / يا اعمالها
يا فلاحين / يا أملها
شمروا / مشولى / قتالى

يا مدافع / قولى / عالى
بكره / ح تخضر / رمالى
ويوتنا / اللى نسفوها
مصانعنا / اللى / حرقوها
راح نبنيها من ثانى

إحنا الشباب

إحنا الشباب السويسية
وإخواتنا فى الإسماعيلية
وف بور سعيد الوطنية
أبطال المقاومة.. الشعبية
على القتال حالفين.. ما ننام
إلّا أما نزيل آثار.. العدوان
من كل بلادنا.. العربية

جلا.. جلا

....
آه م البنات ويدعها
محنة بلادها.. ما تهمها
ع الموضة ضايع.. وقتها
إمتى يحسوا.. جاهم بلا

جلا.. جل
جلا.. جلا
فتح عيونك.. يا ولا
....
شاييل شنته في.. باطه
تقول حاضن.. مراته
كله حركات.. وحياته
كذب/ وتزوير.. ودنجله
....
يقعد يخطب/ بالساعة
كذاب زى.. الإذاعة
في كل كلمه.. إشاعة
زى الغراب / فى الحنجالا
....
شحط وماشى.. ينافس
شعره عامله .. خنافس
زى الحيوان .. ما حاسس
إيه اللى بيحصل فى البلد
....
ما شيه/ تهز/ فى وسطها
فستانها/ بين/ جسمها
حاطه الهباب/ فى وشها
ودايره لف/.. وشنكلا

سامعين

سامعينا/ يا ولاد.. سامعين.
يا صحاب/ البلاد.. شايقين
يا أملها/ وزادها/ وزوادها.
القومة/ إياها/ جه/ ميعادها
فين/ طوابير/ الغضبانيين.
يصبغوا/ لون/ السنين.
من / دم/ الخونه/ والأوغاد
يا خدو/ بتار/ كل الولاد
اخواتنا/ الشهدا/ الامجاد
• سامعينا/ يا ولاد

سامعينا/ يا عمال.. سامعين.
يا طوفان/ شغال.. عارفين
يا قلب بلدنا. وخدامها
يا فحم أيامها. ومكنها
لسه. أمركا هايصة/ في يومنا
وف لقمتنا/ وف بترولنا
بترونا/ في إيد/ الخواجات
يتحول/ لفانتومات
وقنابل/ ودبابات
بتهد/ ف قلب/ بلدنا
ويتقتل/ في أولادنا
وصرخنا/ لكن / هيهات
سامعينا. يا ولاد

يارجال السويس

يارجال السويس يا دشمنه وسناكى
يا مجد العرويه يا غنوتنا يومياتى

* * *

يارجال السويس يا خطاوى وخنادق
يا قلوب لابسه كساكى بتعزف ع البنادق

* * *

يا شهاب السويس يا شرع السفينة
يا بسمة للحباب ونار ع اللى يعادينا

* * *

يارجال السويس بركبان يا منارة
يا مصانع مزارع بعرقنا دواره

* * *

يارجال السويس يا حب وجساره
يا زنودع المدافع بتحمى الحضارة

* * *

يا بيوت السويس يا شهيد وغناوى
يا موال مصر الجاية وممادا الخطاوى

ماكو أوامر

لما أنت/ لسه/ ماكو أوامر
داير تجعجع/ بالشعارات
على إيه/ دا كله/ يا خاين/ عروبتك
دا العدو/ رايته/ فى قلب/ أرضك
ومن/ ثمانيه. وأربعين
والحرب/ داير.
والبعث/ لسه /
بالشعارات/ عمال/ يناور
وإن قلنا/ يللا.
يقوللى/ ماكو
ماكو أوامر
لما أنت/ لسه

يا رمل/ سينا/ قدس. يا جزاير
لبنان/ يا سوريا/ يا يمنا/ ياثاير
انطق/ وقول/ بالحق مين / حنوك
بالدم. والروح لما طلبت/ فدوك
ومن/ ثمانيه. وأربعين
والبعث / داير
بالشعارات عمال يناور
وإن قلنا يللا يقوللى
ماكو.. ماكو أوامر
لما أنت.. لسه

فلسطين

فلسطيني/ يا خيمتي/ يا أمي
يا عاري/ وعرضي/ وهمي
يا أردن/ في / وعمي
النازف/ دمك/ دمي
اسمعي/ يا خي/ وافهمني
أنا منك/ وأنت/ مني
وعدوي / عدوك/ هواه
لدمارنا/ مستتي

صدي معركة أيلول الأسود
سبتمبر ١٩٧٠
أذيعت في إذاعة فلسطين
جماعية

عملها

عملها. / وطلع / منها
بعث الرجعية / الخاين
وقعنا. فى بعض. وكملها
والتأمر / باين

والدم / الى سال / أنهار
فى الأردن.. وفى الأغوار
بيمكن / الإستعمار
وعمله / البعث / فتنها

سبتمبر ١٩٧٠
إيلول الأسود

يادی العیب

يادی / العیب/ والعار
يا أخوه/ يا ثوار
كيف/ ترضوا. لعرويتنا
قوميتنا/ كرامتنا
بأيديكم/ تنهار
يادی العیب والعار

سبتمبر ١٩٧٠
إيلول الأسود

ح يقول التاريخ

ح يقول/ التاريخ

م يخلى

وتحكى/ الدما

عدوى/ عجز / عن ذلى

ما يقبل/ ذل/ هنا

يا خويا/ يا عربى/ يا عمى

العدو/ واقف/ مستنى

• ومناه/ يقضى/ علينا

سبتمبر ١٩٧٠

يا شبل الخيام

يا شبل/ الخيام.
يا باروده/ وحسام
حطم/ الأصنام
خذ/ نارك/ تسلم/ والله
جه. أوان القومه ياللا.
ما ترحم/ خونه. ولثام
ما ترحم خونه ولثام
يا شبل/ الخيام

سبتمبر ١٩٧٠

علمنا البارود

علمنا/ البارود
وصوت / القنابل
والرقده/ فى الدشم
كيف نحلم/ بالسنايل
وعشان/ تبقى بلدنا
بارحه/ تكفى/ عددنا
المجد/ للمدافع
ولكل / شعب/ يدافع
وعن/ حريته/ يزود

سبتمبر ١٩٧٠

يادم الثوار

يا دم/ الثوار
يا سائل / أنهار
في الأردن / والأغوار
إحرق/ دمر م تظلي
خاين/ رجعي/ مستنق
يطلع/ عليه/ نهار
يا دم الثّوار

سبتمبر ١٩٧٠

يا ثورة

يا ثورة/ ع / البعض. مدى
ع الخونه/ شدى/ واشتدى
يا دما/ الشعب/ يا طوفان
أحرق/ خونة / عمان
دورى/ يا ثورة/ م تهدى
دورى/ يا ثورة/ ما تهدى

سبتمبر ١٩٧٠

سبتمبر ١٩٧٠
وفاة الرئيس
جمال عبد الناصر

يا دوبيك

يا دوبيك شبيينا.. يا ناس
وإبتدينا.. نحق.. الكلام

متأخذوناش.

أصل إحنا.. ولاد.. غلابه

لكان لينا.. فى الكلام..

ولا حاجه.

نسمع الراديو..

أغلب كلامه.. ما نفهموش.

نسمع القرآن.

ونرد السلام

ولما أبتدينا نحق.. الكلام

كان المعلم.. مات..

سبتمبر ١٩٧٠

قولوا.. لأ..

قالها شعبي بالحناجر
ناصر ما ماتش
ناصر غيطان حب وخناجر
ثورة حالفة
تحافظ ع المكاسب
ثورة دائمة
ح تدافع تحاسب
قولوا.. لأ.
يا غيطان/ يا مصانع
يا فلاح/ يا صانع
يا رجال. مصر/ العفية
كونوا/ سد مانع
قدام/ كل / طامع
م الخونه/ والرجعية
ناصر/ حى فيكم
عاش عمره/ ليكم
مبادئه. بتناديكم
صونوا. الاشتراكية
وأرفضوا/ الخضوع
وأطلعوا/ جموع
وقولوا .. لأ

قلوا/ لا/ وألف/ لأ
ناصر.
ناصر
ناصر/ ما متش/ وعن/ مبادئه
مفیش/ رجوع
مات عاش/ عبد الناصر
ثائر/ يكره/ الدموع
يا جماهير/ شعبنا
عبد الناصر. جنبنا
عاش إماننا/ وزندنا
مبادئه. باقية/ تدلنا وتقولنا
الثورة/ باقية مفیش. رجوع
...
ناصر ما ماتش
وحى/ بسمه فى النجوع
لا/ وألف/ لأ.
م ترضى/ بلدى/ بالرجوع
كلمت/ جمال
نشيدنا/ يا رجال
حى ع الكفاح/ يا بلدى
وإمسحى الدموع
...
لا وألف لأ.

سبتمبر ١٩٧٠

حى ع الكفاح

خليك / دليل / عملنا
وبسمة. صبحنا
يا صعب / أهلاً بيك
ح ندوسك. ونخطيك
وح ننقش / اسمه عليك
يا ثورة نار م تهدى
ع الخونه دوسى عدى
حققى حلم جمال.

حى ع / الكفاح
حى ع / السلاح.
حى ع الكفاح. يابلىدى. واجمعى الرجال
إتلمى / صف / واحد / خلصى / القتال
أستعدى.
قومى شدى..
إمسحى / الدمع. ومدى
خلدى / ذكرى / جمال

...

يا مصر. ولادك / إحنا
عارفين / الطريق.
نار ع / اللى يعاديكى
وحب / للصديق.
قالها زعيمنا / هوه
اللى إتأخذ / بالقوة
ما تجيبوا. غير القوة
كتفأ / سلاح / نعدى
ونتحدى / التحدى
يا بلدى استمدى
قوتك / من روح جمال

...

يا سر عبد الناصر يا كاسر.
قيودنا.. دلنا

سبتمبر ١٩٧٠

بالروح.. بالدم

حرية..
إشتراكية
إشتراكية
وحدة أمتنا العربية
ناكدها ونحميها
بالروح.. بالدم

بالروح/ بالدم
ح نواصل.
ح نواصل
مشوارك
شعب. وجيش
ح نضحى.
ح نضحى.
يا ابو خالد/ كرامة / لك
ح نحقق/ الوصية
بمبادئك/ هيه/ هيه.
حرية.
إشتراكية.
وحدة/ أمتنا/ العربية
ناكدها. ونحميها.
بالروح.. / بالدم
....
يانن عين / بلدنا
يا نبض/ قلبها
يا معلمها/ الكفاح
يا باني/ مجدها
ح تغنيك/ المصانع
مع كل / فجر طالع
حرية..

سبتمبر ١٩٧٠

ح نكملة

ووجدتنا/ العربية
ملايين/ فلاح/ وعامل
فى/ الغيط/ وفى/ المعامل
ح يادوا الواجب كامل
زى ماقلت ح نعمله

ح نكملة .. ح نكملة.. ح نكملة.
الشعب/ باقى:
واللى/ باقى/ ح نعمله
ونخلدك/ يا ناصر.
يا زعيم/ الأمة.. يا كاسر
شوكة/ عدانا
ولحمانا.
الصعب دوسته بأكمله

ح نكملة/ رايتك/ قضية عمرنا
ياللى. فانيت/ عمرك/ كفاح
من أجلنا
وح نحمل/ طوبه/ طوبه.
وننصر/ العروية
جيلك/ يا أغلى / الرجال
جيلك/ كله / جمال
من سينا/ للجولان
ح نخلدك. ونحرره
كل اللى قلته.. / ح نعمله

ح نكملة عهدك ويشهد ربنا
يا مؤمم قتالنا.. ويانى سدنا
وح نحمل/ الاشتراكية

/ سبتمبر ١٩٧٠

ح نخطى الجراح

تقولك/ المدافع..
كنت/ زعيم/ وأكبر
أسيا رفعت/ راياتك
أفريقا/ من/ أياتك
عرفت/ النجاح

ح نخطى/ الجراح
ونواصل/ الكفاح
ونخلدك/ يا ناصر
عمل/ عرق/ سلاح

ح نخلدك/ يانا ناصر
ونواصل/ المسيرة
مبادئك / هيه.. هيه
بذل/ وكفاح.. وسيره
موال/ للفقارى
دليل/ للحيارى
لقمه/ وكسوه/ وصباح

ح نخلدك/ يا ناصر
تقولك/ السواقى
خضره. وحب/ وسلام
يصحى/ الفقير/ يلاقى
رغيف / وجلابيه
كراسه فى إيد ولاده
تحسه/ ع النجاح

....

ح نخلدك/ يا ناصر
ونضحى/ ثانى/ اكثر

سبتمبر ١٩٧٠

قول المدافع

خلوا/ قول/ المدافع/.. يا خد مداه
ولداه/.. يا ولداه/.. ياولداه.
ولداه/ يا عبد الناصر
زعيمنا/ اللي فقدناه
وفجرنا/ الأخضرنا
لساه يا واد/ بيلالي
خطوا/ الحكاوي
خلوا/ قول/ المدافع..
ياخد/ مداه.

• ولداه/ يا مواويل/ الليل/ والسواقي
السكة تعبّة.
أرضنا/ لسه/ شراقي
واللي / باقى..
كان/ أملنا يكمله
يمسك/ الدفه ويحدد/ الاتجاه

ولداه / يا ولداه/ يا بن عمي/ وخالي
حسك/ تهون/ أرضك.
واسم/ مصر/ الغالي
وطرح/ الإشتراكية.
الشعب/ يأكده
ويجيب/ صباح/ الفل
من / دم/ الغزاه

سبتمبر ١٩٧٠

من قلب الخنادق

من قلب/ الخنادق.. والنار/ والبنادق
ياكتب/ لك يا بلدى.. وأكد/ المبادئ

من قلب/ الخنادق/ والنار/ والدمار

سامع / صوتك. يا ناصر

بيشق / الجدار

راسم / بسمه/ غلابه

بيخنق/ فى الديابه

ويينقش/ نهار.

من قلب/ الصحارى/ والآه/ والصعاب

والطعنه/ اللى فى جيبك/ وغيبه الصحاب

ح نجيب/ فجرك / يا غاليه

وح تعالى/ مره/ ثانية

وتشقى السحاب

يا مصر/ مليون/ سلامه

م الرقده/ والمهانه

تفديكى/ أرواح/ ولادك

اللى راضعين/ عذابك

وعنيهم/ ع النهار

والعدل والإنتصار

من قلب/ الخنادق

سبتمبر ١٩٧٠

يا سلام.. سلم

يا سلام/ سلم
الحيطة/ بتتكلم
والأرض/ قالت/ بالعربي
السبع/ سواقى
مراوش/ السواقى
وسينا/ غريبه/ بتأن
بتنادى/ وتصرخ. يافن
شع/ فى المزارع
جند/ المصانع
إطلع/ فى الشوارع
شد/ بلدنا/ لفوق
تفوق.
تصبح/ وحش/ كاسر
جوه. وبره/ تحاصر
وتحقق/ لمصر.
النصر/ والسلام
يا سلام
سلم

إشتاقنا والله

والوقفه/ طالت/ يا قنال
والضحكة/ دبلت/ فى الرجال
وأشتاقنا/ والله
والسويس.. مشتاقه

أكتب/ بن عيني/ نصرتك
وأرسم. بدم/ قلبي/ فرحتك
وأفرش/ عضايا/ سكتك
نهار/ يغنى / غنوتك
وأشتاقنا/ والله
والسويس/ مشتاقه

يا شمس/ يا شمسوة
يا شراع/ ع المداين
أفرشى/ الفرحة/ لبلدنا
وشاورى/ للسفاين
والوقفه/ طالت/ يا قنال
والضحكة/ دبلت/ فى الرجال
وأشتاقنا/ والله.
والسويس/ شتاقه
ياليل/ يا ماشى/ فى بلدنا
وفارد.
ضكك/ فى/ سينا
وف بلدنا. مارد
مليون/ بلال/ قالوا/ السلام
ع المادنة.
لسة/ الكلام/ والسحر
غاشى/ بلدنا.

والله إن ما خدتونى

والله. إن ما خدتونى
أحارب/ وأنضم/ فـدائى
لأبيع/ كل اللى حـيلتى
وأجيب/ رشاش/ وأعـدى

* *
والله/ إن ما خدتونى
أخـد / تار/ أهلى/ وناسى
لأخـد/ مكانى/ بالعافىة
م يهـمش/ أموت/ أو أحيا

* *
والله/ إن / ما سـبـتـونى
أشـارك/ وأحـمى/ بلادى
لا أـلم/ الدنىـا/ عليكم
سـامع/ صـوتك/ ياسـينا

* *
ياخـلق/ يالـلا/ ندافع
ونحـمى. ولادنا ودارنا
واللى/ ح/ يـمنعنا/ ندوسـه
يا عناد/ الفـيط/ والمصنع

معاكم يا فـدائيه
لسـينا / العـربىة
وهـدى/ اللى/ عـليه
وأحارب/ الصـهـيـونىة

*
وسطيكوا/ أحارب/ بأيديه
فى أبو زعبل/ والشرقيـه
لوح / أزحف/ على إيديه
دا واجـبى/ ودين/ عـليه

*
أأدى/ واجـبى. ودينى
بأيدي/ وسنانى/ وعـينى
وأندى/ لإخـواتى/ تجـبىنى
وإنـتى بتنادىنى

*
عن عـرضنا. وأهـالينا
دا فـرض. ودين/ عـلينا
خـاين. وبـيـعـادينا
أزحف. وحـرر سـينا

شرف الحرب

أوعى / شرف / الحرب /.. يفوتك
إسرع / شارك / واحمى / بيوتك
مهما / كنت / لا بد / تقيد .
فلاح / عامل / إنت / مفيد
تمسك / مدفع
تزرع / تصنع
تطفئ / تدوى
تقول / فى الحرب
حكاوى / غناوى
مهم / يكونك / دور
ما يفوتك

أنا عربي

أنا عربي/ مصري. ناصري
لبلادي. ألف/ سلام
بطل/ في الحرب/ وصامد
ولا/ بكرهش/ السلام
وسلاحى/ فى حد السنكى
الحرب/ ماهوش/ كلام

أنا عربي. وتارى لسه
فى سيناء/ ولا خدتوش
وعضم أخواتى/ خضرت
ونادى. ولا سمعتوش
القومه ياناس/ القومه
وضحوا. ما تبخلوش.
علشان/ يصبح/ سلامنا
حقيقة/ ماهوش/ كلام

يا شمسنا/ البكرية
يا رباية/ البارود
كيف/ حال/ أبوزيد/ وعنتر
كيف/ حال/ أرض/ الجدود
وإن/ سألوكى/ علينا
قولى/ وينون/ حدود
ح نخطى/ لبكره/ قبله
الحرب/ ما هوش/ كلام
الحرب ماهوش. كلام

روح يا لحمام

روح يا الحمام / شقر / وبوس ..
على كل إيد / .. حاضنة / البنادق.
قول / للنسيم ..
أمانة / بذر .
حنى وعطر .
رمل / الخنادق ..
فوت / ع / المدافع / بالسلام
قولها . خطي / الكلام
روح / يا لحمام
...
روح / يا الحمام / وإطوى / جناحك .
ع الجراح .
غرد / ولا غي / وإملا / الملاغى
بالصباح .
دى بلدنا . أخت / القمر
أيوه / القمر .
حافظ / غنانا . وخطونا
ومسير / اللى راح
ج نعيده . ثانى / بزندنا
شمر / يا شعب / بأسم / مصر
وكبر .
بكره / السنابل .. / السناكى
تخضر .

روح يا الحمام /
...
روح / يا الحمام / وقول / لعين الشمس
هدى / شوية .
خلينى / أشوف .. / مصر العظيمة الجاية
من فتحت / المدفع / يا خلق / أهى / طالة
مدوا / الأيادى
وأحرسوها . ماشا لله
والله . بكره .
والله بكره / لنبقى / غنوه
وألف / حكاية
لما / الولاد / ع الشط .
ينقشوا / السهرية
روح يا الحمام
روح يا لحمام

يا مصرنا

إنت/ المعلم. والمعلم/ قالها
م يجيب/ لمصر/ النصر.
إلا رجالها.

يا مصر
عمال/ بلدنا/. يا فلاحين
يا عقلها/ يا مثقفين
أبدروا/ النور/ فى الغيطان
جنودها/ طوفان../ طوفان
واطلقوها../ ع الحدود
كلنا/ نصبح/ جنود

نموت

نموت..

تحيا/ مصر

أمننا

يا مصرنا

يا مصرنا../ يا مصرنا../ يا مصرنا
إحنا/ البلابل/ والقنابل.
فى الغنا.

إحنا/ المصانع/ المزارع../ والقنا
إحنا/ البيوت/ الحواري../ إحنا الأمل
إحنا الزنود. إحنا البارود
إحنا العمل.

يا مصرنا

...

يا مصر/ إحنا/ كلمتك

ولاد/ شقاكى/ وفرحتك

حراس/ حدودك../ خطوطك

نادرين/ حياتنا../ نصرتك

وعشان / م تعالى/ راية النصر

الحرب هى الحل../ يا مصر.

يا مصرنا

...

يا شعبنا/ أنت/ المدد/ والكلمة دايما/
كلمتك.

مزع/ حبال/ صبرك../ يا شعب/ عبي/
قوتك.

وابدر/ عنادك. يابن/ مصر/ الثورة

أكد/ جدارتك/ بالتاريخ/ والثورة

يناير ١٩٧٩

إفرد دراعك

تكون منظومه	إفرد/ دراعك / يابنى وقول
كلوا يحارب/ صف/ طابور	خلى/ كلامك. نار على طول
قول/ يا كلام/ بالنصر/ وبشر	تكشف/ عيينا
قول/ بالحق/ على/ وفسر	وتأئبنا/
دى الحريه/ الدم/ يجيبها	وتجندنا. نصرّ./ الغول
ولا تغلاش/ ع اللى./ طالبها	
وانت/ وهيه..	قول/ يا كلام/ بالحرب/ ونادى
عليكوا الدور	تصحى. بلدنا/ وتتوى/ يا هادى
	تفك/ السحر/ تعوم/ مراكبنا
	تمحى/ النكسة/ واللى راكبنا
	إن كان جن / مسيره/ يغور
	قول/ يا كلام/ عبي/ وعلم
	لف. بلدنا جند/ كلم
	إصحى/ يا شعبي. واحمى/ حماك
	لسه/ عدوك. رايتة/ هناك
	م القدس. لغزه/ لحد/ الطور
	كون / ياكلام/ فجر/ ونسمه
	خلى/ بلدنا. تدوق البسمة
	طالت/ النومه
	ولسه/ القومه.
	عايزه/ الخطوه..

علمنا البارود

علمنا/ البارود/ وصوت/ القنابل

والرقده/ فى الوشم..

كيف/ نحلم/ بالسنايل

وعشان/ تبقي/ بلدنا

بارحه/ تكفى/ عدونا

المجد/ للمدافع.

ولكل / شعب/ يدافع.

وعن حماه/ يزود.

علمنا/ البارود.. علمنا

علمنا/ البارود.. والموت/ والخطر

والعيشة/ فى الخنادق/.. فى غياب/ القمر

كيف/ نحلم/ بالسلام.

والعدل/ والوثام.

م تجيوا/ غير/ المدافع

وشعب / حر/ يدافع

وعن/ حريته/ يزود.

علمنا/ البارود.. ولسعة/ الفجرية

بقوة/ الزنود.. تنهد/ السدود

وناكد/ الاشتراكية.

بقلوبنا/ القوية

والوحدة/ والحرية

عنهم. قوم/ ودافع

بالحرب/ الشعب.. يسود

درويش

أهلاً/ يادرويش
كيف/ سميع. وايش / حاله
وايش/ حال عرويتنا ●
وكيف/ الأهل. تعيش
فى القهرة/ اللى صابتنا
إحنا/ ولاد الأرض
للنصر/ غنوتنا
لكنه./ لسه./ الفجر
لسه/ الفجر/ مستنى خطوتنا
أهلاً/ يا درويش
يا بلبل سهرتنا

فى زيارة للشاعر الفلسطينى
محمود درويش لولاد الأرض
بالسويس

حى على السلاح

ولا فيش/ بغيرها .. خلاص
مهما/ تكون/ التضحية
مصر/ العزيمة .. أعلى
مليون شهيد.
أو ثلاثه .. ما يغلى
يا شعبنا/ ..
عبي/ عنادك .. عبي
وازحف/ كما / جيش/ .. القدر
ما تهدى.

حى/ على السلاح
أهو/ جه أوانك/ .. يا شعبى
خلوا/ الكلام/ بالمداغ
فى قلب/ سينا/ .. يعدى
وإنطلق/ من رققتك
وإنوى/ وقول يا هادى
خلوا/ صلاة الحرب/ .. هيا أدان
السنة/ دى.
...

حى/ على السلاح
للحرب/ مد خطاك
راية/ العدو/ طاله
من سينا/ .. تتحداك
حاشية/ صباح الحب/ .. والحرية
والبسمة طالة/ .. م القتال .. محنيه
أن الأوان ..

يا شعب/ مصر/ يا صابر
صلى/ صلاة/ الحرب
وبأدائها/ .. عبي
...

حى / على السلاح
الحرب/ هيا/ الخلاص
هيا/ الضمان.

١٩٧٣

١٤٥

م ١٠ - فى عز الحرب

الله معاكى.. يا مصر

الله معاكى.. يا مصر
حاميكى.. وراعيكى
وقهرتى أعاديكى
يا ولاد بلدنا.. يا طيبين
يا صامدين.. يا مخلصين
الفجر لاح.. مدوا.. الخطاوى
حولوا العتمة.. نهار

...

الله معاكى فى كيوتك
يا مصر واشتقنا.. الأمان
ضل السلام.. سكتك
والفجر تاه منه الأذان
مدى يا بلدى.. خطوتك
لسه الأمل.. فى سكتك
مصلوب فى خيط.. الإنتظار

...

الله معاكى ينصرك
دايما على من خالك
مهما واجهتى من محن
بتخطى فوق.. خوانك
يا مصرنا يا حلمنا.. يا عشقنا
إحنا جنودك.. نفتديكى بعمرنا
ح نخطى بيكى.. الصعاب
ونجيب الإنتصار
الله معاكى يا مصر

مايو ١٩٧٣

الله أكبر

...
يا مصرنا يا طالة
يا شاقه.. الغمام
لا عمرنا يأسنا
ولا كرهنا.. السلام
حالفين يا مصر بيكي
نادرين العمر ليكي
ح ندوس ع اللي.. يعاديكي
ونخطي الصعب.. بيكي
ومعانا الله أكبر
الله الله
الله الله أكبر

الله .. الله .. الله
الله .. الله. أكبر
الله على كل باغى
دايما يا مصر.. أكبر
وأقوى من كل.. طاغى
الله .. الله
الله.. الله.. أكبر

...
يا شعب قوم.. وحاسب
واسهر على.. المكاسب
إحمى بلادك.. وإفديها
ما ترحم خاين.. فيها
وصونها بين عينيك
دا فرض ودين.. عليك
والله معين.. وأكبر

...
يا تسعة وعشرة يونيو
يا مسطر بالدماء
يا نبض قلب.. شعبي
وصدقه ع الفداء
طالعه يا مصر.. طالعة
على اللي يعاديكي.. والعة
دايسه على من.. تجبر

مايو ١٩٧٣

شعب يا حي

شعب/ يا حي
بكره/ جى
زى/ الضى
من/ قلب الجراح/ طالع
بس/ ياأخى
بكره/ الجى
مالوش/ فى/ الأى
ويلزم/ كل شيء
والع

إسمك غالى

إسمك/.. غالى.
 وشر فك/.. عمرى
 وأرضك/ عرقى/.. حلالى
 وأكبر/ م/ عداكى/ دايماً
 يا بلادى/.. يا قتالى
 مهما/ عداكى/ رعشوا/.. أمانك
 أو غدروكى/.. وخانوا/.. غيطانك
 كل ولدك/ حالفة/.. يا مصر
 ليزفوكى/ فى توب/.. النصر
 تعالى/ وإسمك/ يعلى/.. يلالى
 دايماً/ غالى/ إسمك/.. يا بلادى
 بالأرواح/ نفديكى.
 والله/ م عمر/ الظلم/.. حنانا
 ولا نسانا/ كيف/.. نحميكى
 وأدى/ الريف.
 وأدى/ عطاء.
 رغم/ القاهرة.
 وقوله أه.
 لسة الخضرة/ فارشه/ بلدنا.
 من / سنا بلها/.. قوتنا/.. وزادنا.
 لجل/ ولادنا/ الجاية/.. م تسعد
 خلوا/ نشيد/ الحرب/.. يلالى

قولها.. يا ناصر

قولها.. يا ناصر..

قولها..

قولها وقرب..

يومها..

شعب وجيش

شعب وجيش

شعب وجيش.. ح نخوضها

هيه الحرب

هيه الحرب

هيه الحرب.. بعينها

لجل السلام

لجل م / السلام / يابلدنا
بيقى / غنوتنا .
نهدى / عيدانه / ريحان / للعالم
فرحة / نصرتنا .
كرموا / الإنسان / يا عالم
كرموا / الإنسان
هو / أصل / السلام / يا عالم
هو / أصل / السلام

مسيرنا

وشوه/ يوم ولادنا

يا كتاف المصانع عمالها/ يا فلاحين
يا جيوش/ الفجر الطالع/ بتخضر/ فى
السنين
عرقك/ يلزمله/ حارس.

من صُلبك/ يبقى/ حارس.

واعى وصوته/ على

ما يهابش/ م الليالى

والحرب/ أدان ومادة

ومسيرنا يا ولاد بلدنا

مسيرنا/ يا ولاد/ بلدنا.

نتخطى/ القهر/ الغاشى.

ونغنى/ غناوى./ القمره

مواويل/ الشهدا/ الخضره.

يا سين/ وحسين/ وغباشى

وندوق / طعم/ الراحة

واللقمة / تكون / مرتاحه

من خيرك/ يا بلدنا.

طول/ مافى/ إيدنا/ المدافع

وعرفنا/ عن إيه/ بندق

يبقى/ ح نمد/ الخطاوى

بالدم/ مش/ بالحاوى

وح/ تتطلع/ مصر السعيدة

بسواعد/ وقلوب/ جديدة

من دمك/ يا شبابنا

يا شبابها/ يا عمرها/ يا أصلها

أفدوها. وعيدولها/ أمانها

عربية/ مصرية/ مكانها

حرية. اشتراكية/ علمها

تطرح خيرها/ لولادها

مش/ للى خان/ وسابها

إسماعيلية

أم السنين/ جاية
يا إسماعيلية
يا إسماعيلية.

مسير/ الصبح/ يتبسم
ويملا/ الحواري/ ملاغيه
شايل/ صباح/ الفل
لولادك/ يا إسماعيلية
يا مدينتي/ يا غنوة/ سلام
ورجاله/ فدائية.

يا إسماعيلية.
يا حاضنة/ القتال/ والناس
يا م التاريخ/ بالدم.. متسطر
إحنا لكي/ حراس
يا حمام/ بلدنا
يا بو/ الحكا/ ينباس
غرد/ وفرح بلدنا
وإملاها/ حنيه

يا كلامنا/ يا أخضر
يا حب/ صافى/ النيه
أفرش/ ضياك
وإحنا/ لها/ ديه
يا طير/ يا أخضر
يا وارد/ ع الميه
غنى/ للقموره/ بلدنا

مدوا الإدين

مدوا/.. الإدين/.. قدام.
واتصفوا/.. يا خدام
خلوا/ الكلام/.. مقدم
والبركة/ فى اللمة
...
الثورة/ يا ثورى
ما هيش عمل/.. فورى
ولا كلام/.. دورى
بيخدع/ العامة.

الثورة/.. يا ثوار
ما هيش/ قصص/.. وأشعار
ولا حوار/ على بار
ولا ثرثرات/.. حمّه

الثورة/ يا مناضلين
ما هيش/ بسبب/ الدين
ولا هيش/ بناس/ تايهين
ولا خراب/.. ذمه.
...
الثورة/ يا مناضل
ما هيش/ غضب/ عاجل
ولا جوزه/ تتبادل

تشبط/ الهمة
دى/ الثوار / حُب وناس
يتعارفوا/ بالإحساس
يضحوا لجل/ الناس
بالعدل تتهنى

رياض

إنتباه/ يا بلدنا
يا بلدنا/ إنتباه
واسمعى/ صرخة/ رياض
ولحنى له.. يا إنتباه
أبدأ.
أبدأ
أبدأ
رياض.
رياض
رياض../ ما ماتش
الحرب/ دايره
قلوبنا/ ثايره
الحرب/ لسة/ ما إنتهتس

مارس ١٩٦٩

الثورة

ولا غير/ الثورة/ الدم
ولا غير/ الثورة../ يا عم
ولا غير الثورة/ بديل

ولا غير/ الثورة../ بديل
ولا غير/ الثورة../ يزيل
ويزيح/ العتمة
ويطلق. ألف../ دليل

ولا غير الثورة../ الشعب
طوفان يتحدى../ الصعب
ولا غير الثورة/ الحازمة
يحل الأزمة
يخلص/ مصر من/ المخابيل

ولا غير/ الثورة../ الدم
يزيح/ الغم
يطلق قيد الفلاحين
ولا غير/ الثورة/ الثورة
ولا غير/ الثورة../ بديل
شعبي/ يا شعبي../ طالت/ نومتك
جهز/ قومتك.
مد الخطوه../ شد الحيل
ولا غير الثورة../ يفيدك
يكسر قيدك../ خلى الثورة

تشق/ الليل

تسلم.. إيديك

تسلم/ إيديك/.. يا واد../ يادفعه...
يا عسكرى
تسلم/ عينيك/.. يا واد../ يا دفعه..
يا عنترى
يا ابو/ قلب/ مصرى
ميت/ فل/.. أصلى
تسلم/ إيديك.. يا عسكرى

...

تسلم/ إيديك../ ماسكه السلاح..

متبغده

تسلم/ عينيك/ صاحبة/.. دايم/.. ع العدا

تسلم يا واد../ مليون/ سلام

/ يا عسكرى

تسلم/ يا واد / طول ما أنت/ سهران/ ع البلد

أحلى كلام/.. وأغلى سلام/.. لك/ يا واد

من قلب/ مصر / أم الغيطان/.. متشوقه

من بين/ إيديك.. تتحل عنها/.. المشنقة

وتدوق/ على إيديك الأمان

ينطلق منها/.. اللسان

تسلم/ يا واد/ مليون/ سلام.. يا عسكرى

...

تسلم / إيديك/.. يا بو قلب/ صافى/.. النيه

عمران/ بحب البلد/.. وما لكش/ فى الشلية

الله معاك

غنوا/ غناوى/ النصر
بالقنابل/..والرصاص
يا أحفاد/ صلاح/ الدين
الحل/ حرب/.. مفيش/ مناص
ملعون/ يا صاحبي
أى حل/.. بدون سلاح
الله أكبر ع الأعدى وغدرهم
إحنا لها.
إحنا لها/.. إيماننا/ أكبر/ منهم
لو حتى/ كل الغرب/.. يبقى/ فى صفهم
ملعون/ يا صاحبي/.. أى حل بدون سلاح

الله معاك/ يا شعب/.. قوم
خطى/.. الجراح
ياكل / بيت.
يا كل غيط.
ياكل/ شبر/ فى / أرضنا
يا كل/ كلمة/ وكل/ حرف
وكل نقطة/ فى دمنا
للحرب/ نطلع/.. يد واحدة.. كلنا
ملعون/ يا صاحبي.
أى حل/.. بدون سلاح
....

عبوا/ الشيطان
وعلموها/.. تمسك/.. رشاشات
عبوا/ المصانع/.. بال غضب
وحولوها/.. ترسانات
خلوا/ نشيدها/ تار/ ولادنا..
اللى / إتغدر
وفى سيننا/.. مات.
ملعون/ يا صاحبي.
أى/ حل/.. بدون/ سلاح
....
شيلوا/ السلاح/ وتمعنوا
جيش/ للخلاص

صامدين

صامدين/ وأمر/ ياريس
إحنا/ اشتاقنا/ القتال
أشتاقنا/ للتار/ ياريس
م العملا. والأمريكان
وإن/ كان/ ع الصهيونيه
والخونه/ والرجعيه
ح نخطي/ فوق/ جنتهم
من/ سينا/ لفلسطين

صامدين.. صامدين.. صامدين
ولآخر/ مدى
ع التار/ حالفين/ م/ نهدي
طول/ م/ العدا/ واقفين
حاشين/ نسمة قتالنا
ولسينا/ محتلين

صامدين/ والليل/ صاحبنا
من / طول/ ماصاحبنا
وشرب/ معانا/ الشاي
والصبح. إياه/ واعدنا
وحلف/ بأنه جاي
طول/ م / السلاح في / إيدنا
وع الكفاح عازمين

صامدين/ شعب/ وجيش
صاحيين/ زى/ الصواري
راصدين/ بكره/ اللي جاي
بالبسمة / للحواري
ولجلك/ يا أبيه
يا مصر/ يا عربيه
يام/ القلب/ اشتراكي
بلون / الياسمين

حنفدیکي

يا بلدنا/ حنفدیکي
وح نحرس/ خطاویکی
وح ننشیر/ غناویکی
وصباحنا/ و مسانا
مندورین/ لیکي
أهلاً. يا حرب
أهلاً/ يا حرب
أهلاً/ يا حرب

هم.. يا ولدى

بلدى/ يا شعبي.. يا ندهه عمرى
إطلع/ ثورة/ تسرى.. وتمرى
تقوى/ القلب/ .. ترد/ الروح
بغير الثورة.. العدل.. ماجاش
ولا غير الثورة.. يزيح/ الهم

....

مصر يا مصر/.. مصر/ يا مصر
غيطان/ يا مصانع.
فكى. الأسر.
قولى.. وثورى.. ردى/ حدودك
فكى/ السحر/ اللي/ مافادناش
دورى/ يا ثورة..
وزيحي الغم

هم.. يا ولدى

إسرع.. هم

لم عضم/ إخوانك

لم

خلى/ دموعك

تفرى/ ضلوعك

لجل/ م/ تصحى/ تفوق

تهتم.

عشنا/ سنين/ الثورة

كفاح/

داخ/ العامل.. والفلاح

نبنى/ ونزرع/.. يحصد/ غيرنا

عافرنا/

عافرنا/

ولا نبناش.

غير/ شى/.. جراحنا

طفحت.. دم.

....

شربنا/ مرار/ الصبر.. سنين

ماتت فنيا../ عطات/.. الدين

ديننا/ الحرب/.. على/ الأوباش

ديننا/ ندوس.. ونثور/ ع الظلم

..

إضرب.. كمان

إضرب / وإضرب/ كمان
فى قلب/ الأمريكان
أنا/ من/ فوق/ القنال
وأنت/ فى قلب../ الأدغال
وقضيتى/ قضيتك../ هى
الإنسان/ والسلام
ح ترش/ الأرض../ حنه
لمعلم/ جيلكوا.. وجيلنا
هوشى../ هوشى/ منه
الإنسان/ والسلام
أهلاً/ أهلاً فیتنام

يا شعب الثورة

م الريف/ ومن../ البنادر
ما ترحم/ أى/ فاجر
بيخون/ مصر/ الأبيه

يا شعب مصر../ الثورة
إطلع يا وحش../ يا كاسر
يا ولاد مصر../ الحره
بيناع الخونه../ نحاصر

يا شباب مصر../ يا دروعها
عمال../ يا فلاحين
يا قلوب للتار../ شرقانه
شايله/ هم/ .. السنين
يا زنود/ الغيط/ والمصنع
يا صاحب/ الاشتراكية

يا شعينا يا ثاير/ فى المصنع../ والنجوع
آن الأوان إتكلم../ وصمم/ ع الطلوع
خد/ تارك وإحمى../ بلادك
طالت/ نومتك/ وعذابك
يا شعب/ عبي/ عنادك
إزحف/ وإحمى../ القضية

خدوا تارها. وخلصوها
من ظلم/ اللي/ .. إحتلوها
إطلع/ يا شعب/ يا قادر

المعركة طويلة

• المعركة../ طويلة
إحنا../ فحمها..
محتاجه/ جهود../ نبيله
صمودنا../ مهرها
ومصر/ الحرة../ طالعة
من/ قلب../ قهرها
أرواح/ شهدانا../ شموعها
ومشاعل../ فجرها

يا رفاقه

ع الحرب/.. مصممين
...
عطشان / وجراحنا/.. حمضت
يا بهيه م العويل
ويا سين/ ويا الرفاقه
للفجر/ سهرانين
حالفين/ م يسيبوا/.. تارها
عارفين/.. الى غدرها
بس. تفضي/ الأيداي
ويعودوا/.. منصورين
...
يا مصر/ رضعنا/.. صبرك
وقايدہ فينا النيران
الروم ع / الباب.. يدقوا
وتتارنا. في الغيطان
وتقولي إيه/ خلاصها
أأقولك / كل ناسها
في العرکه/ صف/ واحد..
وعنيهم مفتوحين

عطشان/ يا رفاقه .
للتار/ من/ إسرائيل
عطشان و الجرح/.. ملح
م الوقفه/.. في/.. الهجير
يا عناد/ غيطاننا.. إطلع
قوم/ فتش/ ع السبيل
...
ما نيش/ عابر/ سبيل.
ولا ضيف/ في البلد.. دى
أنا ابن/ مصر/.. يا خال
وترابها/ عظم/.. جدى
أنا راضع/ غل/.. طينها
موالى / من/ أنينها
مصر/ يا ضحكة/.. غلابه
يا عشق الشقيانين.
...
عطشان. والرقده/.. طالت
وزاد/ بينا/.. الحنين
وسفاين/ الصبر/.. مالت
وقلوعها/.. قلقانين
أوفى بوعدك/.. يا ريس
نصف/ نظم.. كويس
ومعاك الشعب/.. بحاله

ديسمبر ١٩٧٣

يا هباب

سبحان العاطى.. الوهاب
يعطينا ويعطيك.. يا هباب
من غير متكافح.. وتناضل
ولا تعرف عن إيه.. بتناضل
مع إنك غبى.. وبهيم
مكتوب لك فى الغيب.. يالئيم
أمانه ورئاسه.. لمجلس
كرسى وعلى كرسى.. تمجلس
وتوافق/ وتقول.. أمين
وتلهف ميه.. وثمانين
وتحلى عيشتنا.. هباب

يا حمام

يا حمام
روح قوام
لجمال
بوس خنوده
وقول له جنوده
إشتاقوا والله
للقتال

خلاص

خلاص/.. خلاص/.. خلاص.
مفیش/ م الحرب../ مناص.
أطووا/ الحكاوى../ يا خلق.
دى/ الراية/ فى قلب../ سينا.
خنجر/ بيشق../ شق
كرامتنا/ وف/ ماضينا
واللى بيخل/ على بلده
خساره/ يكون/ بلدنا
وده/ حكم/ ورأى / الشعب
اللى / م يكونش/ معانا
خاين/ ويبقى/ علينا
دا/ رأى/ الشعب/ خلاص
خلاص../ خلاص../ خلاص / خلاص
مفیش. م / الحرب../ مناص

حنحارب

حنحارب.

حنحارب.

حنحارب.

حنحارب/ حتى/ النصر

ونموت/ وتعيشي/ يا مصر

عمال. وفلاحين

وجنود/ ومتقفين

هيا/ القوه/ يا بلدنا

هيا. الغنوه/ والنشيد

عمال وفلاحين.

الحرب.. يا خلق

الحرب. حرب/ يا خلق
م هياشى/ بكى/.. وقوله
الحرب/ نسف/.. وحرق
ويحور/ دما/.. سياله
لما/ الحكاوى/.. يا خلق
والو/ لسان/ الكلام
الحرب. حرب. يا خلق
م لهاش/ فى السلام
م لهاش/ فى السلام
م لهاش/ فى السلام

ملعون داء السكوت

خواف/ ومش مقدام
قاطع/ طريق. الإقدام
شال. خطاوى/ الحقيقة
راعش أمان/ البيوت
ملعون/ ياداء/ الكلام
والرغى/ ع / الفاضى
ملعون/ ياداء/ السكوت
ع/ اللى. إحنا فيه/.. راضى
ويلدنا. مكسورة/ الجناح
غيمانه/ من كتر/ الجراح
مصلوب. مصيرها. وفجرها
مشلول / ضميرها/ وزندها
غارسين / فى جوفها/ الخوف

ملعون/ ياداء/ السكوت
ملعون/ ياداء/ الكلام
الفاضى.
ويلدنا. مرعوشة/.. الأمان
والعدا/ دايسه/.. الأراضى

ملعون/ ياداء/ السكوت
لما. تكون/ م/ الخوف
ملعون/ ياداء/ الكلام
لما تكون/ ملفوف
بتمص/ دم / الغلابه
تسقيه. حليب/ للديابه
تطلع/ فى/ ما نشيت/ الجرايد
فن/ بصراحة. وكوم/ قصايد
تسرق/ سنينا/ الحزانه
سايب/ عدانا/.. تفوت

ملعون يا داء الكلام
بره الميدان قاعد
ملعون ياداء السكوت
خواف/ ومتباعد
ملعون/ يا أى / كلام
ع الفلاحين/.. كلام

يا عيني

عيني/ علينا/ إحنا/.. غلابه
من غير/ قرايه/ ولا/.. كتابه
وباعونا/ الأفنديات
يا عيني

...

سابونا/ من / غير علام
من غير/ بصاره/ من غير../ إمام
وكلتنا/ الأرض/.. كلتنا
شربتنا/ عرق/ وسابتنا
خضرنا/ سنينها/.. شقانا
ويادوك/.. طلنا/ غدانا
عرايه/ واقدامنا. حافيه
وباعونا/ الأفنديات/.. يا عيني
ياربان/ السفينه
ياديس/ ع المدينه
ورينا/ إيه/ اللي.. لينا
وخذ / نن/.. عني
وسييب/ صدر/ الخلاق
يفضفض/ بالمدايق
ماراح / العمر/.. راح
واشتاقنا/.. للبراح
وباعونا/ الأفنديات
يا عيني

يسعد صباحك

الفرقة. صعبه/ والحرب../ أهيه
الوقفه/ طالت/ والمراسى
نسيت غناوى/ السمسيميه
مشتاقه/ للنصر../ وغناه
ولبسمه/ الصبح../ اللى/ غايب
....

وحياة/ غلاوتك../ يا سويس
يا بلاطوه/ يا اسمعلاويه.
ح تعودوا/ تانى../ للقناه
والبواخر. رايحه../ جايه
والولاد/ تملا../ الحوارى
والفل يطرح/ فى الخرايب

يسعد/ صباحك../ يا بلدنا
يسعد/ مساكم/ يا حبايب
من طول/ غيابكم/ .. إحنا.. دويانا
وفى بلدنا.. عايشين/ غرايب
نلضم/ الصبح/ فى مساه
وإشتاقنا/ والله
والقلب../ دايب
....

يسعد/ صباحك../ يا سويس
والشمس/ طالعاه../ بين حطامك
يام / التاريخ/ ذهب/ وقضه
للغريب/ فاتحه/ بيبانك
يام الولاد../ واقفه/ إنتباه
إشتاقنا/ والله../ يا حبايب
....

مليون/ ساله / يا قتال
يا بور سعيد/ يا سماعيليه
ياللى/ التاريخ/ حافظ/ غناكم
عمل.. غرق../ وفدائيه
مهما/ القدر../ زاد../ من أساه
إحنا/ أكبر/ من../ التوايب
....
أهل/ القتال../ أهلى/ وناسى

دايماً فوق وعالى

دايماً / فوق / وعالى
يا صوت / .. شعبنا
إطلع / شق ..
/ .. الليالى
يا كفاحنا / .. يا عزمنا
يا صديق / بلدى / فى الغيطان
إظهر / وبان.
إلحق / سنينك / واللى .. فاتك
من / زمان.
وإطلع / عالى / عالى
يا صوت يا شعبنا
طول / م / صوت / الشعب / .. عالى
والعين / .. حارسه / .. النهار
والإيدين / .. عاشقة / .. عرقها
والحرب / مطلب / .. مش .. شعار
يبقى / حرب / الشعب / كله / .. يقوم يحارب
صف / واحد يحمى بلده / .. بجيش / لا تبالى.
محارب
طول الليالى.
مهما / تكون / الصعاب
الشعب / فوق / كل .. الصعاب
الشعب / هوا .. الفدا.

شيلو الحمام

شيلوا/ الحمام

زيدوا/ العلام.

متزيفوش/ اسم السلام

متزيفوشى/ إسم/ السلام

خلوا/ الكلام/ .. يطلع/ .. لهب

خلوه/ يدرذب/ فى الغيطان

تتطلع/ ولاده/ .. بتلتهب

طوفان/ ج يزحف/ .. صرخته

عاليه. وعارفة/ سكته

الحرب/ هيه/ .. غنوته

شيلوا/ الحمام

زيدوا/ العلام

متزيفوشى/ اسم السلام

يا شباب

يا شباب/ العروبه
افدى/ عروبتك/ واهميا
قوم/ ودافع
كون/ مدافع
فى/ قلب/ الى يعاديا
والى/ ينظر/ ويثر
ويعطل/ مسيرتنا
يبقى/ عميل/ لعدوى
وخاين/ لعروبتنا

أى كلام

ولا/ حاولنا/ نضحك../ ضحكة	حلا نجه..
تقوم/ الدنيا.	بلا نجه..
وتبقى حكاية.	وأى/ كلام
أهى عيشه/ حلانجه../ بلانجه	بنضيع/ وقت../ وأهى/ أيام
وأى كلام	مدام/ الحاله/ البادية../ فاضيه
...	لافيها/ بسمه../ ولا دخان
وبلا نجه	تبقى/ العيشه
بلانا/ المولى	حلانجه/ بلانجه../ وأى كلام
بشلة/ علاولا	...
كبيرهم ساجر. ومفناوى	حلانجه../ يعنى
فى غفله / أتانا.	الحاله/ الناشز../
وقولنا/ أهو/ جانا	مفيهاش/ حافز../ ولا ضلايه
يحل/ الأزمة../	ولا ينفع/ فيها../
وأى/ بلاوى	غير/ تكويها../
وقولنا../ على الله	بمسماز/ بلدى
يكون المولى	محمى/ بغل/ الخلق/ فى / بلدى
أراد/ يرشدنا	الدايخه/ سنين/ الثورة
ويرشدنا	الغاية/
ويعوضنا/ عن / دى/ الجوله	من / عهد/ يوتوييا.
فتحنا/ قلوبنا../	للكتنولوييا.
وأدى/ زنودنا	ما عرفت/ مصر../ الضحكة../ الآيه
ويالالا/ ياعم../ نمد خطانا	وإشمعنى../ إحنا../
نرد/ حدودنا	لو/ إتبحبنا.

ونبدأ نبني/.. سنينا/.. الجاية
وهات/ يا أمانى
قولى/ يا أغانى
خلو/ شعار/ الرحله/.. الجايه
علم. إيمان/ وألف حكاية
وهات/ يالف/.. وها/ تنطيط
هو يزمر/ وإحنا/.. نزيط
أتارى. آخر/ الزمر/.. طيط
وطلعنا هُبل/.. وهوه/ عبيط
ورجعت تانى..
حلانجه/.. بالنجه/.. / وأى كلام

يوماتي

يا شهاب/ الجماعه/.. ياللى
بالخلاص/.. تطلب/.. تغنى
ناقصك/ إيه.. يا نور عينيه
ناقصة إيه/.. ؟
يا سيد/ زمانك
كلنا خدام/.. عشانك
وبرضه/.. أمنا/.. ع القضية
...
مصر/ ياما/.. يا نشيدى
سينا/ يا جرحى/.. وصديدى
رقدتك. نار/.. قايدة/.. فى
مهما/ طالت/ بيكى/.. السنين
إحنا/ نبضك/ شغالين
ثورة جايه/.. عاصفيه
...
يا شموشنا/ سجانكوا/.. فاجر
يا سمير غطاس/.. يا صابر
يا سهامنا/.. يا فتيه
غنوا بالثوره/..
يوماتي
أقلقوا/ السجان.. يتطاطى
مصر فيكم/.. جايه/.. جايه

يوماتي.. يسهر
نكتب. ليلاى
نزعق/ نهاتى
نحكي/ أبعاد/.. القضية..
القضية/.. يارفاقة
بالحداقه.
العباره/ فى/ النوياره
والقضية/.. مهليه

...
ألف لجنه/.. وألف مجلس
ع / الكراسى/ فيران/.. بتجلس
لجل/ مايناقشوا/.. القضية؟
والمعارضة/ هزار/.. يا ساده
والموافق/ قانون/.. وعاده
والصمت/ حكمه/.. منبريه
والقتال/ ضد/ المصالح
وانتوا/.. أصحاب.. المصالح
فى الحلول/ الأمريكية
يبقى/ حتما/ وإن لازم
أى عضو/ وكله/.. لازم
يبقى/ مخلص/.. للماهية
...
يا ثكالى يا أرامل
يا مصانع/.. يا معامل
يا غيطاننا/.. الجاهلية

للصبر حدود

وتعتقنا/
إنما/ للصبر/ حدود.. للصبر/ حدود/.. يا حبيبي
للصبر حدود
وصبرنا/ يا ست/ وصبرنا
ورحنا. ورححنا
والطشت/ قاللي
قومي. إستحمي
وشحط/ يغنى/.. يتمنى
ويسهر ليله../ يستتى
يمكن/ حبيبته../ يعود
...
يا صبر/ يا صبار
مضغوك/ الغلاية
زرعوك/ يا صبر
على قبر/ الشهيد../ لبلايه
زى/ الهوى/ يا حبيبي/ زى الهوى
غنوك../ الديابه
نشيد/ للجبل
يهد/ الحيل../ وزيادة
إنما للصبر. حدود
...
وإمتى/ يا سى/ أيوب/ تفارقنا
تعتق. خطانا/ يا شيخ

شكلوا .. ٩

تتفجر/ في جحور.. التعابين
...
يا جرايد/ تطلع/ بصراحه
على / دورة الميه.. بلا إستئذان
كلمات متقاطعة/.. وسواحه
والبنط/ ييفرش/ كام/.. فدان
والكدبه/ جاية../ ومرواحه
وسينا/ يتيكى/ على/ الجدعان
وإن كنتوا/ نسيئوا/ اللي/ جرى
هاتوا الدفاتر تتقرا

شكلو/.. هآ.. أو
شكلو../ لو/.. لو
هآ أو../ أو.. / أو
صحفنجي/ ياواد
شعرانجي/ ياواد
يا مناضل/ على سنجة/.. عشرة
إن كنتوا. نسيئوا../ اللي جرى
هاتوا. الدفاتر../ تتقرا
...
هاتوا/ الأهرام
هاتوا/ الأخبار
والجمهورية. والمساء
يادقون. وشابة/ م المزمار
ياعقول / م الجبن/.. مليسه
يا أقلام/ لو كان/ ماسكها/ حمار
كان/ خلى حالتنا/ كويسه
...
عناوين../ عناوين/.. عناوين
شعارات/ الرحلة/.. أمين
يا سينما/ يا مسرح/ كله/ غسيل
وقصايد/ عافقة/ عقول/ ملايين
ياشباب/ الجيل
العقده/ فتيل

زوزو

خلي. بالك..

من/ زوزو..

واحكى. حكاية/.. مرمر

والى / يجيب/.. سيرة/ الخلاص

على/ بوزه/.. يتجرجر

...

مدد/ يا ست/ إمتثال

يام/ التاريخ/ فى الهالى/.. جال

إيه/ يعنى..

ما فى/ داهيه/.. الرجال

وفى داهيه/ سينا/.. والقنال

إيه/ دخلكم/.. م/ الحالة/ عال

والأمريكان/.. عاشقين/.. بوزو

...

عمار/ يا مصر/ بحسهم

والكباريهات/ وبوسطهم

وصحافة/ خاييه/.. تحسهم

وتحكى/ عنهم/ ظرفهم

وليه يافقر/.. تغمهم

دى الكوره/.. لسه/.. مع زيزو

يا عم حمزه

وعايزه/ غمزه
ولجل/ ذلك
طلعوا/ التلامذه
وقالوا/ لا/ لا/ لا..
بألف حمزه

...

يا عم / حمزه
من / إمتى / مصر / كانت / .. بخيله
ولامره / هانت.
ولا أستكانت.
لاى .. حيله.
وكم خانوها / .. وكم عزوها
داست. وخطت / ع / اللى داسوها
وسينا / لسه / تايهه / .. وغزه
ولجل / ذلك / طلعوا / التلامذه
وقالوا لا بألف حمزه

يا عم / حمزه
كبروا / التلامذه
وقالوا / لا / لا / لا..
بألف حمزه
...

يا عم حمزه
معادش / ينفعنا / .. الكلام
ولا أى / شنته / ..
مهما / شالت / .. من / سلام
أصل / التلامذه
كبروا / يا حمزه
وعرفوا / إيه / .. معنى الالام
ولجل / ذلك
طلعوا / التلامذه
وقالوا / لا / لا / لا..
بألف حمزه

...

يا عم حمزه
الجهود قليله
ومصر / عايزه / الجهود / .. كثيره
وعايزه / صحوه / .. وألف / حيله
تعتق / خطاها / .. تمشى / المسيره
والوقفه / طالت

يا فركوكة

عشرين/ سنة/ وزيادة
يا حبيب/ لكل قيادة
يا مبرر/ أى/ بلاوى
يا فارس/ كل حكاوى
ولا خوف/ ولا خجل
مسيرها/ تروح/ السكره
ونفوق. ونحاسبك/.. بكره
ويومها/ ح تتعدم.

يا بتاع/ كله/ يافركوكة
يا أشهر/ من / علم
يا بوقلب/ بليد/.. ما يهكم
لا نكسه/ ولا ألم
ياذكى/ جداً/.. جداً
ياخاين/ أب/ وجداً
يادابحنا/ بالقلم
....

يامرن. جدا. ومهاود
على أى/ حال/.. بتهاول
إن قلوا/ يسار/.. فيسار
وإن قالوا/ يمين/ تندار
ديتها/ مقال/ والثانى
وتشيل / العلم
....

يا صريح/ وبكل صراحه
تدبح/ يومنا بنجاحه
مرتاح/ وأخر/ راحه
ودايسنا/.. بالقدم
بين/ كل مقال/ والثانى
بتهد/ لنا/.. الأمانى
وتلبسنا/.. العمم
.....

إخرس ..

يونيؤ/والرجال/..	إخرس/ ولد/.. بطل كلام
يا بارد/ وإنت/ مالك	سياسة/ حرب../ أو سلام
هو القتال/.. قتالك	أسهل/ لك/ يابن/ والدى
م تتنيل/.. وتسكت	تخش/ فى الزحام
وتربى العيال	فى مولد... سيدك../ الشواربى
...	إتقنط/.. وإبقى/.. غربى
يا مناضل ياسيدنا يالى	وجارى الزمان
شمال	وسبيك/ م/ السياسة..
يمين.. تغنى	وإنعم/ بالكياسة/.. فى/ خير/ الأمريكان.
يا أديب هذا.. الزمان	ح تبص/ تلاقى/ نفسك.
يا ظريف.. يا بن الاكابر	نلت/ اللى / ما كان../ فى نفسك
يا نجل الأسطى.. جابر	ببركة/ العم/.. سام/.. !!
عجان قرن السلام	يا مواطن/ يالى ماشى
العز حلو يابنى	وبتحلم / بالسلام
صدقنى مش.. كلام	أفندى. أو صنايعى
حكمه قالها.. اللى قبلى	لو حتى./ تكون/ إمام
أحسن لك م.. العلام	حسك..
وسبيك م الغلابه	مره.. يتناقش
خليك ويا الديابه	أو/ تسأل/ لك/ سؤال
والناس.. السمان	وتجيب/ سيرة/ الخلاص
تطلع لك بعربيه	والحرب/ والقتال.
جنبك حنت وليه	ملعون/ أبوك../ وسينا
وسبيك م القضية	صدقنا/ ما نسينا/

وحكاية الإشتراكية
وطظ في النضال
وتقدر بالشطارة
تلتهف مجلس إدارة
وإن كان حثت عمارة..
ما تضرش.. يا كمال
بس ماين.. وطاطي
متقولش فين.. مراتي
حتوصل تبقى.. عال
وبص بعينك.. وطنش
وسد/ الودان
تلتهف/ عنين/ بلدنا
يا سبع/ الزمان..
وسيب / الكفاح/ لغازي
وروق..
يا إنتهازى..
دا/ أنت/ إين / النظام
أسهل/ لك..
يا ابن والدي
تخش / في الزحام

حلمنا خضر

قد ما نتعب/ نعاقر
كل خطوه/ ليها/ آخر
أبدروا/ واروو/ الشراقي
بالعرق زى / السواقي
يارفاقي/ الوقفة/ طالت
وأحنا/ ياما/ كتافنا/ شالت
حلمنا بالثورة خضر

حلمنا/ بالثورة/.. خضر
طل م/ الجامعة/.. يكبر
والأدان/ إسمك/.. يا غاليه
والصلاة/ بالثورة/.. تكبر.

توهه/ يالفه/.. طريقى
توهه/ يا شاله/.. خطايا
مين/ عدوى؟

مين صديقى/
مين / سبب/ توهتى/.. وأسايا
ضللوكى/ بالأمانى
توهوكى/ فى الأغانى
عشموكى/ ببيكره أحسن
بعتى/ حلقك/ للضحايا
شربوا/ عسلك. وفاتوكى
باعوا حلمك/ يا ضنايا
نسيوا/ إنك. دايماً/ قادرة
تتطرحى/ النوار/.. مزهر

يا حبابي/ يارفاقى
يا زنود/ مصر/ العفيه
اللى/ يزرع/ يوم/ يلاقى
زرعته/ شايله/ وجايه

اطلق كلابك

إطلق / كلابك.
ع / المدن/ والريف
أخنق/ زهورنا
وانصب/الهليله
وأعمل/ حسابك.. فى الضباب/ والزيف
طرح/ السنة دى/.. كان/ حصاده/ كيله
والطرح / خير. والحصاد.. مبروك
والله عزوه/.. والكفاح.. ضليله
....

طوبى للزراع..
والإيدين/ مشدوده
تزرع/ صباح/ الحب
والسكن/.. مسدوده
طوبى/ للى مصر/ ضى عنيه
طوبى/ للى الصهد.. شق إيديه
طوبى/ اللى / فى الزنازن/.. نازل
تهمته/ عشق/ الوطن/.. والعيله
طوبى/ لكل / لسان/.. مصر همه/.. وقوله
طوبى/ للإنسان/.. فى الصف// واخذ/ دوره
طوبى/ يافقرا/ لما/.. تشدوا/ الحيل -
يطلع/ عرقكوا/ نار.. / تشق/ الليل
تفرض/ غناوى/.. تعتق الترحيله
....

١٩٧٢

عمر الباروده

عمر/ الباروده ..
وحصلني../ هناك.
لم / الرجال../ يا جوده
وهات/ فاسك../ معاك.

...

لم / الرجال/ يا جوده
وبينا/ ع القتال
نأدى. الفرض/ يا ولدى
ونحج/ مع/ الرجال.
نتوضى/ برملة/ سينا
ونكحل/ منه../ عينا
نحمر/ زهر/ اللى عبروا
وغيروا / الأحوال

.....

عمر/ الباروده.
واتصف/ فى الطابور
وانده/ على أهل/ البندر
يصحوا/ يا خدوا لهم../ دور
يطلوا/ الحكاوى .
ولطعة/ القهاوى
دى/ العركة/ واعره../ يا ولدى
عايزه/ الراجل/ .. جسور

أتحداك

أتحداك.
أتحداك.
إنت/ وأى قوه/// معاك
قرب../ جرب../ ثانى
غرورك
المره/ دى ح تلقى../فناك
...

أتحداك/ قوم/ جرب../ ثانى
ناحية/ سينا../ واللا/ جولانى
مهما/ كلاب/ الشر../ أدولك
مليون/ فانتوم/ لو بعثولك
أتحداك/ تصلب../ طولك
ولا تهوب../ ثانى../ هناك..

مصر المارد/ صحيت/ ثانى
زاحفه/ تكير../ مصر/ أدانى
فى لحظه/ عبرنا..
طوفان../ كالطيف
دوسنا. الخط../ وراح بارليف
مهما/ حاولت../ تروج/ زيف
جيشنا/ الظافر../ لسه../ هناك

....
عبرنا/ سنين/ القهر../ كفاح

دا احنا/ الصبر/ فى ديننا// سلاح
أقوى/ من صلفك../ وغرورك
اشجع. من جبنك../ وجنودك
لما جنود/ الحق/ راحوا لك
رخت مسلم عرض قفاك

١٩٥١ معركة كفر أحمد عبده

ما تزعلش/ يا أحمد عبده
ح نهذهمك.. زى/ ما هدوا
الله/ أكبر / عليهم
المولى قادر يفنيهم
إحنا السوايسه/.. ح نوريهم
وبنار جهنم../ نصطيهم
ونبنى/ كل/.. م هدوا

حامى السويس/.. يا غريب
إيدك فى إيدى/ المولى يزيد
والله أكبر عليهم.
المولى/ غضبان/.. عليهم
لادبابات/ راح تنفعهم
ولا الحرايى/ ح/ تشفعهم^(١)
والفتريش/.. ح نهذوا^(٢)
يا أرسكين/ يا بن الخاييه^(٣)
مالكش/ فايدة/.. ولا عايدة.
والله/ أكبر / عليهم
بعون/ الله راح/ نفنيهم
والترانزيت/.. ح نولعه^(٤)
والماركاب/.. ح ندغدغه^(٥)
والنافى.. ومليون قده^(٦)

- ١ - الحرايى = جمع المراكب الحرايية
- ٢ - الفتريش = محطة تكرير المياه
- ٣ - أرسكين = قائد القوات البريطانية ١٩٥١
- ٤ - منطقة الصباح الآن.. (معسكر الراحة)
- ٥ - الماركاب = الميناء المقابل لضفة القناة - بورتوايق
- ٦ - النافى = مجمع استهلاكى ببور توفيق

من حنينى

من حنينى.. طالع.. شاهقة.. غنوتى
 شايلىه/ أسايا.. وجرح قلبى.. وخطوتى.
 يا عنيه.. يا عاشقة/ النهار
 يا حلم عمرى.. يا إنتصار.
 باحلم / أشوفك.. يا حقيقة..
 غنوه/ حلوه.. فى اللسان
 باحلم/ أشوفك.. ياعداله.
 غنوه/ فوق / كتف/.. الغيطان
 باحلم/ بيوم.. البسمة/ فيه..
 حاضنة/ الأراضى.
 الكل / راضى..
 والأيدى/.. بتخنقك/.. يا إنتظار
 ...
 باحلم/ أشوفك/.. يا بلادى/.. بره جزنك
 بالسلام/ متكحله.
 باحلم/ اشوفك/ فوق/ جبين/ الدنيا
 غنوه/ مجلجله.
 باحلم/ اشوفك/ حاضنة/ كل / المخلصين
 واللى ضحوا/ الروح.
 لجل م / تخطى/.. الحصار
 باحلم/ يا مصر. بعصر.. كل/ الناس/ حباب
 باحلم/ يا مصر/.. بالورادى/.. زاحفه/..

يا قمر..

رسمك/ ضيا.. / عيني
من/ خندفي/ باكتب
وحلم عمري/ الانتصار
يا قمر

يا قمر/.. يا قمر.
حلفت/ بلدنا.. / بالأمل
والسهد/ جرح.. / عيون النهار
طال/ الانتظار
يا بسمه/ شوق.. / وحنيه
أصل/ الأمل..
يطرح/ غناوى.. / الانتصار
...

يا قمر..
يا بسمه/ حب.. للعشاق..
مشتاق/ أنا
مصلوب/ يميني/ ع الزناد. والفجر.
عيني على/ سينا.
مشتاق/ أنا
حاضن/ فى صدرى/ مدفعى
راصد / خيوط.. / شوق/.. نهار
...

يا قمر..
يا بو الحكاوي/ والسمر..
طوف/ من / هنا.
بارك / خطاويننا
طال/ الشوق/ ياسينا
جائ لك.. أنا جائ

حلمنا.. الأخضر..

حلمنا/ الأخضر/.. بدا
يا شعبنا/ يابو.. / الفدا
وانزاح/ من فوق/ كتف.. النهار
الليل.. المخاوى.
ويعد/ طول. الإنتظار
حلمنا/ الأخضر/.. بدا

...

هيا. إنطلق / يا شعبنا/.. نوار
عبي/ المصانع/ والمزارع/.. نار
واسمع/ ندايا/ من هنا/.. يابلديا
الوقفه/ طالت/ وسينا عايژه/.. الديه
ورغم/ قسوة/ الإنتظار/.. ح أصمد/ أنا
لآخر/.. مدى

حلمنا/ الأخضر/.. بدا
ياولاد/ بلدنا/.. زندها/ يا ثوار
حقوا/ الحقيقة/ للغيطان/ والتار
راية العدو/.. من سينا/.. طالة عليه/
كافيه السفاين/.. ومحرمها. الميه
هيا / إنطلق/ يا شعبنا. قدار
أطلع/ بارود/ ع اللي. إعتدا
حلمنا/ الأخضر/.. بدا

العبور

عبروا الولاد/ السمر
مجاديف/ الإنتصار
جولك/ يا سينا/.. بعد شوقه
يخلصوكي/ م التتار
جولك/ على/ جسور..
من عضاهم/
ينقشوا/ بكرة/ الحنين..
من دماهم.
رفعوا/ علمك/.. يا بلادي
قمره/ في عز/.. النهار
...
عاشوا/ الرجال/.. السمر
جيش/ الفلاحين
تسلموا/ يا جنود/.. بلادي
ع الأعدى/.. منصورين
تسلموا/ يا زند/ مصر/.. وفخرها
مصر / فيكم/ طالع/.. تتحدى السنين
شايله/ بكرة/ من دماكم
جي ضى. ويسمه. خضره. في كل / دار
تسلموا. يا نسور/ بلادي
في السماء. زى / الرعود
تسلموا/ فوق السفاين
زى/ موج/ الضى

٦ أكتوبر ١٩٧٣
بنا

طالعة السويس

طالعة السويس../ طالع
شامخة/ كما../ قمم/ الجبال
طالعة/ السويس../ والع
مارد ح/ يتخطى../ المحال
ولا فيش/ محال
قدام شبابك. / ياسويس
لا مستحيل/ يقدر../ على/ عند الرجال

.....
طالعة/ السويس../ الشعب
تتحدى/ الحصار
طالع / شبابها../ الصلب
بيضد التتار
حالف/ بدمه يفتديكي../ ياسويس
يا نبض/ مصر/ وصدقها.. وقت النزال

.....
أبدا/ م/ جنبطل/ كفاح
أبدا/ م جنبطل../ غنا
أبدا/ م ح/ نمل/ السلاح
لو. حتى / طالت../ ميت/ سنة
نصرك/ غنانا../ إحنا زنديك.. يا سويس
يا أسم / غالى/ دم
كتبوه/ الرجال

٢٤ أكتوبر ١٩٧٣
بنها

صدق اللى.. قال

صدق/ اللى/ قال/.. والله
مسير إالحى/.. يتلاقى
وإحنا/ أهو/ يا سويس..
إتلاقينا.
مليون/ سلام/ وعواف..
يا مدينتى.
يا جنتى/ وعمرى/.. يا سفينتى
جأى/ لك / أنا
وكلى/ شوق/ للمينا
وإحنا/ أهو/ يا سويس
يا سويس. أتلاقينا

٢٤ أكتوبر ١٩٧٤
السويس

وجينا ..

وعدنا/ نيجى/.. وجينا
دفعنا/ الديه../ يا سينا
خطينا/ الجراح.
بالنار/ والسلاح
ولا يمكن / ح / نهدي
ولا تغفل/.. عنينا
إلا../م/ نحرر/ أرضك
وجولان والضفة/.. تجينا
يومها/ وبس
ح / اقول/ لك.
بالأحضان/ يا سينا

يا رايح السويس

من بعد / غريبه / .. سنين
إياك / تنسى / اللي .. فات
واللي / إتشرد / .. ومات
بكره / بالفرح / .. أت
وح تسعد السويس.

يارايح السويس
أمانة الله / .. عليك
أول / ما توصل / .. لبابها
توطى . تبوس / .. ترايها
وتتذكر / .. شبابها
مين مات / .. ؟
ومين يعيش /

....

يارايح / السويس
بلدى / وأمل / .. وغنايا متطلش / ع الخرايب
ولا تحزن / ع اللي / .. غايب
بكره / تيجي / .. الحبايب
وتعمره / .. السويس

....

يا رايح السويس
حسك / تدمع / .. عيونك
واللا راسك / تطاطى
وتفكر / فى اللي راح
وتفكر / فى اللي أتى
بكرة / أجمل / صباح
ح / يطل على / السويس

....

يا رايح السويس

يناير ١٩٧٤

قد.. القول

قد/ القول../ قد/ القول
قد/ القول../ كنتم/ يا سوايسيه
قد../ القول

يا قمر/ يا صاحبنا../ فاك
سهرتك../ وسط / العساكر
والحبيبة/ الحلم../ هيه
مصرنا/ الجاية../ الفتية
والرجال/ الشمس../ صاحبة
تغزل/ النصره../ على النول..

.....
يا قمر/ وأدى. إحنا../ تانى
التقنيا. ويا/ الأمانى
يد/ الواحدة همه. واحدة
والرجال. الكاكي../ صحبه
عشنا/ يوم القيامة../ واكثر
وكان/ ندانا../ الله وأكبر
جبنا/ الصباح../ من قلب/ الغول
لفت/ الأيام/ وأدى. إحنا
فى السويس../ عاشقين/ كفاحنا
غنوة/ الكروان../ شهيدنا
أصل/ بكره../ وأصل عيدنا
حيا/ ع / الحب../ اللى بينى
مصر/ حره..
عرض/ وطول

خلديهم.. يا بلدنا

خلديهم / يا بلدنا ..
لما نصرك / .. يبقى / .. عيد .
على محمود / .. ابن / .. قلبك
مصطفى / وأخوه / سعيد
خلديهم / يا بلدنا .
...

خلديهم / يا بلدنا ..
وقيدى / .. منهم / نور / صباحك
خلدوكى / هم قبلاً ..
لجل م / تعودى / لبراحك
إبراهيم / سليمان / .. وأشرف
إحمد أبو هاشم / فى أشرف
ملحمة . والمولى / حافظ
ندهتك / قاين يا حافظ /
والسويس / .. ادان / .. ومادنه
خلديهم .. يا بلدنا

لوحة شرف
المشاركين فى فرقة ولاد الأرض
من يونيه ١٩٦٧ .. أكتوبر ١٩٧٤

فرقة البطانية ١٠ يونيه ١٩٦٧

- ١ - محمد غزالى (الكابتن) مؤسس وقائد المقاومة المنطقة / دفاع شعبى
- ٢ - مصطفى أحمد غزالى متطوع
- ٣ - غزالى أحمد غزالى .. (حافظ) متطوع
- ٤ - ضيف محمود خليل متطوع
- ٥ - مصطفى محمود حنفى متطوع
- ٦ - عز الدين منسى
- ٧ - رمزى عثمان
- ٨ - شحته أبو الجديل
- ٩ - زكى عبد العظيم
- ١٠ - غريب عبد اللطيف
- ١١ - على صبره
- ١٢ - عبده عبد الرازق
- ١٣ - فتحى السيد طه
- ١٤ - فرج سيد أحمد
- ١٥ - عبد الله حسن خليل

الشعراء المشاركون فى نشاط الفرقة

- ١ - أ حسين محمد (كلامنا يا علمنا)
- ٢ - أ كامل عيد رمضان .. (ريس البحريه)

- ٣ - أ عبد العزيز عبد الظاهر (ضى الليالى)
٤ - أ عطيه محمد علينا / (ولادى كلكم)
الشاعر الكبير عبد الرحمن الأبنودى
شارك فى جولات وعرض الفرقة
(يا بيوت السويس)

ملحنون شاركوا فى نشاط الفرقة

- ١ - الفنان إبراهيم رجب (بيوت السويس)
٢ - أ.م حسن نشأت
٣ - أ - محمد حمام، بيوت السويس

فرقة ولاد الأرض سبتمبر ١٩٦٧

منضمين جدد

- ١ - صلاح عبد الحميد آدم - متطوع - (كابوريا) مغنى
٢ - غريب محمد سالم - متطوع - بوجى إيقاع
٣ - محمد محمد عويضة - متطوع - شافعى مغنى
٤ - إبراهيم حسن بدران - متطوع - سمسميه
٥ - محمد حسن حسين - متطوع - مغنى
٦ - عبد الله صقر - مستبقى - مغنى
٧ - منصور نصارى محمد - متطوع - مغنى
٨ - صبره عبد الرحمن - متطوع - مغنى
٩ - محمد سعد - متطوع - سمسميه
١٠ - أبو السعود أحمد - متطوع - سمسميه

المحتويات

٣٨ الألف ميل	١٥ ولا لغيرك
٣٩ برهوم	١٦ ولاد الأرض
٤٠ ضى الليالى	١٧ الحرب الحرب
٤١ ياريس البحرية	١٨ ملعون
٤٢ أنا صامد	١٩ يا سلام
٤٣ لا لا يا «أمريكا» لا لا	٢١ سجل يا زمان
٤٤ فات الكثير	٢٢ مش ح نسلم
٤٥ متسلحين	٢٣ احنا لها
٤٦ بسنانى	٢٤ التغيير
٤٧ يسلم	٢٥ اشرف شيء
٤٨ إحنا	٢٦ حالفين لنجيب النصر
٤٩ بكره	٢٧ دبلة عيون القمر
٥٠ سهران	٢٨ موال بهية
٥١ ع الكنال	٢٩ طوابير
٥٢ هيللا .. هيللا	٣٠ القسم
٥٤ إنت فين	٣١ أم الدنيا
٥٦ الدب	٣٣ انذار
٥٧ توته توته	٣٤ فاكرينك ياسينا
٥٨ إنت المسئول	٣٥ قوم يا شباب
٥٩ صاحى	٣٦ أبـوح
٦٠ يامثقفين	٣٧ مش مهم

٨٤	عنوان	٦١	إمتى العيد
٨٥	يحرم علينا النوم	٦٢	عريبه
٨٦	والله ح ترجع تانى	٦٣	ليه يا حمام
٨٧	لإمتى ح تفضل ساكت	٦٤	غنى باسمسمية
٨٨	مرثية الشهيد مصطفى أبو هشام	٦٥	التصر قرب
٩٠	صف واحد	٦٦	ياشعب العروبة
٩١	حلبوا	٦٧	طريق النضال
٩٢	أنا جى يا سينا	٦٨	قول كمان
٩٣	يا ولاد البلد	٦٩	كلمتى
٩٤	شدوان	٧٠	اصحى.. يا مصر
٩٥	يا إذاعة	٧١	مرثية .. الشهداء
٩٦	مش ح اغنى للقمر	٧٢	نشيد فتح
٩٧	فوق التل	٧٣	نشيد الجبهة
٩٨	هل هلاكك	٧٤	ياللبى
٩٩	الفجر طالل	٧٥	ياهادى
١٠٠	عوف الأصيل	٧٦	اشتدى
١٠١	تك .. تك	٧٧	الجزيرة الخضراء
١٠٢	راية النصر	٧٨	أصدق نغم
١٠٣	ولو	٧٩	من جوف الخنادق
١٠٤	اشهد يا ليل	٨٠	من عيون برج الحمام
١٠٥	أسوان	٨١	الفاخرة
١٠٦	ح تقول السويس	٨٢	اضرب ياعدوى
١٠٧	يا مدينتى	٨٣	بلدى

١٣٣	قول المدافع	١٠٨	العتبة قزاز
١٣٤	من قلب الخنادق	١٠٩	الف عام
١٣٥	ياسلام .. سلم	١١٠	رايح الجيش
١٣٦	اشتاقنا والله	١١٢	يا مدافع لالى .. لالى
١٣٧	والله إن ماخذتوني	١١٣	احنا الشباب
١٣٨	شرف الحرب	١١٤	جلا.. جلا
١٣٩	أنا عربى	١١٥	سامعين
١٤٠	روح يا لحمام	١١٦	يارجال السويس
١٤١	يامصرنا	١١٧	ماكو أوامر
١٤٢	إفرد دراعك	١١٨	فلسطين
١٤٣	علمنا البارود	١١٩	عملها
١٤٤	درويش	١٢٠	يادى العيب
١٤٥	حى على السلاح	١٢١	ح يقول التاريخ
١٤٦	الله معاكى يامصر	١٢٢	ياشبل الخيام
١٤٧	الله أكبر	١٢٣	علمنا البارود
١٤٨	شعب ياحى	١٢٤	يا دم الثوار
١٤٩	اسمك غالى	١٢٥	يا ثورة
١٥٠	قولها.. ياناصر	١٢٧	يادويك
١٥١	لجل السلام	١٢٨	قولوا .. لا
١٥٢	مسيرنا	١٢٩	حى ع الكفاح
١٥٣	امماعيلية	١٣٠	بالروح بالدم
١٥٤	مدوا الايدين	١٣١	ح نكملة
١٥٥	رياض	١٣٢	ح نخطى الجراح

١٨٠	للصبر حدود	١٥٦	الثورة
١٨١	شكلوا	١٥٧	تسلم ايديك
١٨٢	زوزو	١٥٨	الله معاك
١٨٣	يا عم حمزة	١٥٩	صامدين
١٨٤	يا فركوكه	١٦٠	حنفديكى
١٨٥	اخرس	١٦١	هم ياولدى
١٨٧	حلمنا خضر	١٦٢	اضرب كمان
١٨٨	اطلق كلابك	١٦٣	يا شعب الثورة
١٨٩	عمر الباروده	١٦٤	المعركة طويلة
١٩٠	اتحداك	١٦٥	يارفاقه
١٩١	معركة كفر أحمد عبده	١٦٦	يا هباب
١٩٢	من حنينى	١٦٧	يا حمام
١٩٣	يا قمر	١٦٨	خلاص
١٩٤	حلمنا الاخضر	١٦٩	حنحارب
١٩٥	العبور	١٧٠	الحرب يا خلق
١٩٦	طالعه السويس	١٧١	ملعون داء السكوت
١٩٧	صدق اللى قال	١٧٢	يا عيني
١٩٨	وجينا	١٧٣	يسعد صباحك
١٩٩	يارايح السويس	١٧٤	دايما فوق وعالى
٢٠٠	قد القول	١٧٥	شيلو الحمام
٢٠١	خلداهم يابلدنا	١٧٦	يا شباب
٢٠٢	لوحة شرف	١٧٧	أى كلام
		١٧٩	يوماتى

رقم الابداع : ٢٠٠٠/١٣١٨٩

شركة الأمل للطباعة والنشر
(مورافيتلي سابقا)